


AMAYEPO-BWILA A MĪSI

GĀKUFUMA MU LYĀLABWE

 Uswe tukupalisya ulubunju ulu panongwa ya Kuyapo kwa Ntwa Kyala, kũko kwābagile ukwānda ububōmbelo bwākwāndāna ukwisila mu kutupapo uswe i ndumi, ukuti—ukuti uswe tukufĩmbilisigwa “ukupilikisya, yaga baluyĩndiko” pankyeni pa Umwēne, ukuti Umwēne ali nakyo ikĩndukimo ikyākujoba kwa uswe. Une nsisimikisye ukuti Umwene ikubombaga ikyo iki Umwene afingile. Umwene bwila ikubomba i Lisyu Lyake. Kangi polelo uswe tukupalisya ukwibungania palikimo, bũmi, kangi ulubafu ulu ulwa Syepwa ulubunju ulu, kangi tubagile ukummwiputa u Ntwa kangi, nu kwibũngānia twibene palikimo nu kupilika kwa Umwene. Iyo yo nōngwa uswe tukwisa palikimo, bo bubĩngililo ubu.

² Lilino, une mu luko lumo ulwamibelo nĩsile pa Nkundwe Neville, kisitakugũliligwa, umwĩsyũgu, panongwa ya njosi yimo une nāli nayo. Ikyo... Une ngwitika mu... Une... mu njosi. Une ngwitika ukuti Kyala ikubombela na bandu ukwisila mu njosi. Kangi une nāli ni njosi insitakwisibiligwa fiyo, ikilo kya pakiyolo. Ukuti, une nābũkàga mula ndubafu lwa kām̄ba, ulubafu lwa kām̄ba kamo, ngubũka ku buyo bwākulila kũko une nābagile ukuya ni fyāngu—fyāngu ifyākulya. Kangi une ndinkukētēsya ukuti, bo une nĩsaga kifuki ku buyo, abēne bākubàga inyĩmbo, ikubugitila kya bwĩmbi kikuba ubwĩmbilo, na maviyolini, nukubasangalusya abāndu akabalilo kāko abēne bālyàga. Kangi kyalipo ikĩndukimo ukufwana ni kyene iki une ngakiganile, polelo une ndinkukikilania itolo ikĩndu. Kangi une nalyāgéne nu munduyumo ikwisa pa kām̄ba. Kangi une ndinkukéta, kangi abandu bingi bāfyukaga ku kām̄ba ku buyo bwākulila ubu. Lōli une mu luko lumo ndinkusōkàko ukufuma ku bēne, ndinkusanukila ukugomokela ku kililo, pamo ku kīmāma.

³ Kangi mu njila yimo, pāsi nkikoga, une nābagile ukukéta ikitēmbē. Une ndinkupilika amasyu ga yumo, gikuti, “Twagane na Nkundwe Branham pa bupingiko bwakuti-bwakuti. Umwēne yo ikwisa ukusuluka pa kām̄ba pamwanya pala. Kangi mbũla umwēne ikĩndu kyākuti-na-kyākuti.” Kangi une ndikubopela ukuti mfike ku bupĩngiko ubu.

⁴ Kangi akabalilo kāko u mũndu ikwĩsapo, ikyēne āli Nkundwe Neville afwēle i suti ya lāngi yakibũngu, ābonekaga itolo ngati umwēne ikubonekela itũgēsye pala ulubũnju ulu. Kangi umwene alinkuti, “Nkundwe Branham, linga ugwe

kuyaga nkaya,” alinkuti, “ikyene kikuyaga i—i kindu kinunu kwa ugwe ukwisa pási, panongwa yakuti Nkundwe Hank. . .” Lilino, yu mwêne ntiga une mmenye, Nkundwe Hank yo Nkundwe Henry Carlson, uswe tukunkóléla umwêne Hank. Alinkuti, “Umwene abagile ukwinogona ikyene kyáli kihesya ukuti ugwe ukâkiyâtile i kipanga kangu mma linga ugwe kuyaga pakusyungutula nkâya kala, pamo ukusyungutula nkaya ka masiku manandi.” Une ndinkusumuka.

⁵ Kangu, pa ikyo, une naalipilike mu luko ulwa buhesya. Une ngálonidaga’mma ukutika nkati nkabalilo kala ka ndungu, mpaka une nalindalusisye Nkundwe Neville linga umwene ali nafyo filifyosa ifyapasima ndubunju ulu, panongwa ya kipanga. Popápo umwêne áli gwaipyana, múmo bwila, áyobíle, “Isaga kíndililága kuno.” Popápo, uswe itolo tukíndilile ukwisa. Une nálinkólile umwêne bo kwílile pamusi, nukwisa nkati ulubunju ulu, kisitakugúlila kwa aligwesa gwa uswe.

⁶ Lilino une ngwitika ukuti ikyene kikuyaga kindu kinunu, ikyákwánda, kwa une itolo mu luko lumo lwa uku—uku ukulíngánia kwa umwe ifindu fimo. Une ne, mwákubagilila, fiyo múndu unkíndáne ku bándu bíngi. Kangu une ne mu luko lwa kuyankíndáne kwa nímwêne, níne. Panongwa yakuti, une ngugela ukukongésya ukulongolela kwa Mbepo Mwikemo, itolo kifuki mumo une mbagile. Kangu ikyo kikupela uswe ukuya bakindane, muketile. Uswe tukubomba ifindu ifi uswe—uswe naloliloli tukwitúgàsya pasi kangu tukuswiga utubalilo tumo, “Nongwa ya fiki une nábómbíle ikindu bo ikyo? Ngimba une nábombíle bulebule ikindu bo ikyo?” Kangu palapala polelo ugwe ubagile ukwinogona ukuti ugwe ubombile katikati iki ugwe ukaabagiile ukubomba. Loli linga ugwe itolo kuyaga mfindang’oma, nukuya nu lwítiko, kangu ugwe usisimikiisye ukuti Kyala akulóngwisye ugwe ukubomba ikyene, ugwe kwisakusyagania ikyene kikubomba itolo katikati kutalusya. Muketile? Kangu utubalilo twingi uswe tukwaga ikyo. Kangu une mmenye Nkundwe Neville akyagile ikyo, utubalilo twingi. Kangu abalóngosi kangu abándu bamwambepo bikusyákania isyo.

⁷ Akene kafumile ukuya kabalilo kamo mbumi bwángu aka. . . Nubwanaloli-ndumbula, ukufuma pápo une náli itolo ndumiana, une ngálipilikémo siku ukulongosya kulakula ukuti une mbagile ukwítugála mu—mu Jeffersonville. Ikyéne kyo kyála mbwéle mu nyémba, kuli une ukugela ukwítugála kuno. Ubuyo bwákwánda, utubalilo nubupelakisa tutikwítikisánia na une. Ikindu ikíngi, kukufwána kuliko kusulumanisa kwa mbepo.

⁸ Linga umwe mukugomokela nukukéta kubuyobumo apa, linga ikyéne kikályónangike nkabalilo ka mógésyo, alipo kalata gwa kufwána na ikyo, uyu une nálinayo, ikyákwánda ngoleligwe mbutumigwe, une ndinkwánda ukuleka. Kangu Nkundwe George DeArk na une. . .

⁹ Na māma gwa Nkundwe Graham Snelling, Nkundwe Hawkins uyu ikwendesya kubugulisya mafuta mu New Albany, kangi bīngi ba bāndu, bālyāgène na une pānja pa kabuyo akanini akakwīputilako akakwāganilako ukukilania kuno. Kangi pōpe kyāyobigwe, linga une nābagile ukusyāla, abēne bābagile ukuti abāna bābo balumililēge ku mēsa, uku—ukuyēnga i kitēmbe, popāpo abēne āngāli batikufimbilisigwa ukupimbigwa palipōsa ukufuma ku buyo ukubuka ku buyo.

¹⁰ Akabalilo kako une numpilike u mama unnini yula, nu mwana yumo akolelile ku kiboko kyake kangi uyungi yumo pa lukōngi lwake, ikuyoba ukuti umwēne āngāli ikwīgāna ukubalumilisa abāna bāke ku mēsa, ukuti tuyēnge u buyo bumo kūko abēne bābagile ukwitūgāsya nukwīpūta, ikyēne kyāli panini fīngi fiyo kuli une ukwīkasya. Popāpo Nkundwe George na une tuli nkuya palikimo nukwīnogōna uswe tukusyālāga nukuyēnga i kipānga.

¹¹ Kangi akabalilo kako ikipanga kyayēngigwe, ikyene bwila kyābonekaga . . . U lubūnju ulu une nāsayile i kipānga, i mboniboni yālīsile, iyi yisīmbigwe kangi yili mu libwe lyapanguto pala, akabalilo kako u Mbepo Mwikemo aayobile kwa une, “Īki kikaya kitembe kyako mma.” Muketile? Kangi une ndinkusuma kūko ikipanga kyangu kyāli, kangi Umwene alinkunyakasya une pasi pa mabingu ga bluu. Kangi polelo Umwene alinkuti, “Bomba imbombo ya nsasanianongwa,” na fyosa bo ifyo, mumo umwe mukumanya. Ukwene kusimbigwe mope mmabuku.

¹² Ifindu fyosa fila fibīkigwe palikimo. Kangi ilisiku limo akabalilo kāko une nasēngāga ulubingilo pamwanya pala papo Nkundwe Wood ikwitūgāla lilino, kangi u māma-unko gwāngu itūgalāga kula pa kabalilo kala; une nālītugesye pa lifyūkilo lya kunyuma, akanini akaiyolo akafyūkilo ka konkiri, aka une nāyēngile ubuyo ubunini ubu pala panongwa na māma-unko gwāngu. Kangi umwene ali mu luko lwa ndindilakipanga gwa kipanga ukufika kabalilo kala, ukupakikisya ikyene. Kangi itolo napabwelu bo aligwesa ābagile ukuyoba, i Lisyu lilinkuyoba kwa une, lilinkuti, “Une ngabagilamo siku ukukusaya ugwe akabalilo kosa ugwe kwitugasya apa. Ugwe kufimbilisigwa ukwipagulania gwimwene ukufuma ku bandu bako kangi ubuyo ubu.” Mulimōsa, une, kila itolo kilinkundepulania une mu tupatu, kifuki u ndungu pa ukōngelelāpo.

¹³ Kingikingi, akabalilo kōsa, i Kindukimo kinsokile une, “Sōkāpo, sōkāpo. Semela ku bwīngilil’ilisuba. Umilisyaga ukubūka ku bwīngililo.” Ena, une. . . Ikyene akabalilo kosa kikundamia une. Kangi kikuboneka ngati akabalilo kalikosa . . .

¹⁴ Lilino, une nātēndīke ikyēne pabwelu mu linogono lyāngu ukuti undungu ugu une nāpululukāga ku Tucson, kūko une ngulōnda ukwāsima ubuyo, nkuya kula mapepo aga; ukubika

abāna mmasukulu, ukwānda Seputembala. Une nāli nu buyo. Bwālipo nu buyo bwakumbapo une kula. Lōli kilipo ikindukimo iki . . . Kangi—kangi linga une nsōkilēpo . . .

¹⁵ Ikindu ikingi une ngulōnda ukuyoba. Itolo bo uswe tukāli ukuyēnga inyumba iyi pamwanya apa, inyumba ya ntimi, kūko iyēne yiliko lilino, une ngālōnda ukuyenga pala. U māma gwa nkasi gwāngu āli nkāngāle. Kangi umwēne ālilile nukulila isya ikyēne, umwēne alinkuti, “Une itolo ngabagila ukundeka u māma kuno, mmēnye umwēne nkāngāle, kangi umwēne lumo atikupakisigwāga.” Ena, une nāpilikisye ikyo. Une ngupilikisya. Uyo yo māma gwāke, kangi u māma mwene uyu umwene ālimo nagwe siku, pamo isakuyamo siku nagwe. Polelo, une nāpilikisye kila. Polelo une—une nālipūtīle kwa Ntwa, une ndinkuti, “Ntwa, ukuya ukuti une ngabugana u buyo bula,” Une ndinkuti, “ndendekesya une nīkutīlēge. Une ngubukaga kulikosa Ugwe kulonda une ukubuka, ukufuma paliposa. Loli une ndikulonda ukunsulumanisya unkasi gwangu, ukunsōsyapo umwene ukufuma kuno, ukwīngila nkisū ikihesya kūko umwene amunye nayumo. Kangi polelo une nsōkilepo akabalilo kosa, munjila yiliyosa. Ndendekesya itolo une gwākūwikūtila ukuya apa nu mwene.”

¹⁶ Kangi lilino, akabalilo kako unna egigwe, kangi umwene akindile ku Lwimiko, polelo apa bukwise ubugūtīgwe kangi, muketile, lilino ukukindilila nkyeni. Une ngamanya isyakubomba.

¹⁷ Kangi polelo i lisiku limo akabalilo kāko ikimanyisyo iki aba bakundwe bālyāndīle ukusyungutila, une nālimile ukufuma pa kigemo akabalilo kabumalikisyo une nāli apa nukubabula umwe ukuti une ngabagila ukuya pa ngunda pene papo ikyo kyayaga pakubombigwa. Popāpo, bakundwe nīlipyāna balinkugolosya lōsa ikyo mōsa. Ikyēne kyo kyōsa kyēlwīke mōsa. Nkati mwa sala malongo-mabili-na-sina, ikyēne kyāmalisigwe mōsa.

¹⁸ Lilino pa kwigula pa ngunda kangi kwa une. Une ngamanya isyakuti mbombe. Une ngamanya yo njilanki iyakusanukila. Une nunsumile u Ntwa kuli i mboniboni. Une nalindalusisye Umwene ukuti mbombe kiliku. Loli Umwene itolo ikwitikisya une nitugasye.

¹⁹ Lilino, nkilo kyammayolo akabalilo kāko une nabasōsisyepo abāna bōsa, unkasi gwangu na bōsa, ukufuma ku nyumba, une natēndike ukwīyipa kwa Ntwa Kyala. Kangi une ndinkuyoba kwa Ntwa Kyala, “Linga Ugwe kusayaga une mu njila iyi une ngubūkaga, une ngukubōmbelāga Ugwe. Lōli Ugwe kwisakufīmbilisigwāga ukunāngisya une kwākubūka, nakabūkilo, nikyākubōmba.” Polelo, une ndinkwibika nimwene kwa Ntwa. Nu—nu butumigwe na bosa, une ndinkukibika ikyene kwa Ntwa. Kangi une ndinkuti, “Kulikosa kuko Ugwe kwigula, kilikyosa iki Ugwe kubomba, une ngwendaga mu njila

yila. Mpaka Ugwe kutendeka injila, une ngukindililaga itolo mumo une ngubombela mpaka Ugwe kutendeka injila.” Kangi une nalindalusisye Umwene ukukupela ikyene ukuya kyēluke fiyo ukuti une ngabagila ukusyobigwa akabalilo kala, kabuno une naloliloli ngwitika ukuti uswe tuli papo pa mipingikano gya misebo gya kindukimo ukuti kiboneke.

²⁰ Une ndinkupilika ikyene kyāsolwile ulubunju ulu ukwisila mwa Nkundwe Neville, pamo āpēle ikyēne kūko une nāménye ikyēne kyāli—ikyēne kyāli busololi ubu umwēne asōsolangako. Lilino, polelo, une niputiile mwesa umwe, kangi une ngulondigwa umwe mwesa ukunyiputula une, ukuti u Mbepo Mwikemo isakundongolelaga une katikati itolo kūko une ngufimbilisigwa ukubuka, iki une mbagile ukubomba, polelo une ndisakubomba ubusobi.

²¹ Umwe muketile, utubalilo twingi, abandu bikwinogona ukuti ikyabupi ikyabusololi, ukuti Kyala ikuyoba itolo “Une ngukupimbaga ugwe papapa *apa*, nukukutugasya ugwe pási *apa*. Lilino ugwe itolo bukaga papapa ukukilania *apa*.” Kangi Umwēne atikukubula ugwe ifindu fyosa fila. Linga Umwene ābombile, polelo ngimba lo lwitiko lwakupōnjōla luki ulu ugwe gwāli nalo? Muketile? Muketile, ugwe, Umwēne ikukuleka ugwe gwīme pagwīmwēne kīngìpo ukukīnda aligwēsa uyūngi. Muketile? Umwe mwesa mubagile ukwisa kwa une nukusuma pa findu fimo, kangi Umwene akatoligwámo siku loli iki Umwene abapele umwe ilyámulo. Uko ko kutalusya. Ena. Loli une mbagile ukunsuma Umwene pa findu fya nimwene, kangi utubalilo twingi Umwene itolo ikundeka une nīmwene, muketile, itolo ikundeka une nsokepo nukwingila mu kyene.

²² Une ndinafyo ifindu lilino ifi une ngufimbilisigwa ukunosya lōsa nīmwēne, ni nyīnogono une ngufimbilisigwa ukutēndeka. Kangi iki kyo kimo kyākulōndigwa fiyo, mpaka une ngabagila katikati ukukitēndéka ikyēne mpaka une nsimikisye ukuti ikyēne yo Mwēne ikuyoba kwa une. Kangi une—une . . . Umwene atisakumbapo une imboniboni. Umwene itolo ikunyitikisya une nimwene. Polelo une itolo nitugesye ukuya bo mpīna, bo, ulu, ulubunju ulu, une—une ngamanya ukuti yo njilanki iyakusanukilako. Polelo, une nkibikile ikyene kwa Ntwa.

²³ Une—une ndinkwipilika akabalilo kala, mu njosi iyo, une mbagile ukugomokela kuno ku kipanga nukuntūla u Nkundwe Neville mpaka ikindukimo ikīngi itolo kyabonike mula mu nsebwe. Popāpo, une nisakuyaga mula.

²⁴ Une nālinsumīle u Nkundwe Neville akabalilo kanini aka kakīndīle, “Ngimba ikipānga kikukīndilila bulebule?”

Kangi umwene alinkuti, “Kanunu.”

²⁵ Kangi polelo une ngupilika ukuti umwe mukāli muli ni fyabupi ifimwambepo ni findu pakati pa umwe, ifi fikubombabomba, ifikungilwa fya busololi, kangi—kangi

ukuyobela mu ndimi, nukusanusya kwa ndimi, ifi uswe tupilikemo pabutasi panandi. Kangi ifindu fila fikuyenga ku kipanga, kangi fyabukulumba.

²⁶ Loli une ndinkwinogona, lumo ikilo iki une mbagile, linga Nkundwe Neville . . . Linga u Mbepo Mwikemo atikutulongosya uswe ku kindukimo ikikindane, ikilo iki une ngulonda ukuya nako i . . . Umwe mwesa, bo mukali umwe ukusokapo ulubunju ulu, ukusimba umwe i lilalusyo nukulilambalika ilyene apa, amalalusyo gamo mu linogono lino, ukuti uswe tubagile ukusyagania iki ikipanga kikwinogona. Iyo yo njila iyi abatimi balinayo iya kusyagania itolo iki kili pa ndumbula ya banda. Kangi aligwesa yumo gwa umwe na malalusyo, simba ilyene nukulilambalika pamwanya apa. Linga ugwe ukuya nako akapatu ka kalatasi uku—uku litwala ilyene nkyeni ulubunju ulu, polelo simba ilyene ikilo iki, nukulabila. Popapo, une ngulonda ukuya nako itolo kakingi akabalilo mumo une mbagile, pa gene, ukugaketa agene mosa kangi Mwamasimbo ukubamula umwe.

²⁷ Polelo linga u Ntwa ikwitikisya, linga ikyene kikuyaga bwigane bwa Kyala, une ndendike ubuyobelo apa pakaya patali'mma, ukuti une ngulonda ukuyoba kwa umwe pa Fungilo ihano-na-ibili isyabumalikisyo isya . . . isya Busetuli. Lilino linga uswe . . . Une natoligwe ukufikamo injila yosa ukukindamo i Fungilo sila ikynja iki, panongwa yakuti ikyene kikwega ukufuma pa ntu gwa 6 gwa Busetuli, ukwisila mu—ukwisila mu ntu gwa 19, ukufika ukwisila mu Fungilo sila. Loli isyakwanda sitatu pamo sina sya isyene syabagile ukwamuligwaga nkati nkilo, une ngwinogona, i Fungilo yiliyosa ukuya kilo.

²⁸ Lilino, linga uswe tukupilikisya, muketile, kuko uswe tukwima palapala pa Buku gwa Busetuli lila, kuko i Kipanga kyalyegigwe mmwanya mu Lwimiko, polelo ifingi fya ikyene fikubombela na baYuda, komma ni Kipanga napanandi. Ikyene kikubomba ni kikolo kya kiYuda. Polelo uswe tukufimbilisigwa ukugwisa pasi, ukufuma ku Bunyakiligwo bwa Kipanga, nukwega . . . Uswe tukuketa apa iki kikuboneka akabalilo ka Fungilo sila, kangi akabalilo ka Kipanga kya Bapanja. I Kipanga ukuya kikindile; kangi ni kikolo kya Israeli, ikyene kikusatuka ukugomokela nukutwala Israeli ukufuma ku kabalilo ikyene kyasokilepo na bene, mpaka ku kabalilo kamwisyugu; kangi u Mesiya ikwisa, akabalilo kako abene bikwambililaga u Mesiya.

²⁹ Lilino umwe mukupilikisya ikyene? I Kipanga kyegegwe losa. Kyala abombile ikyakwanda ni Kipanga, i Ngulilo ya Kipanga. Uswe twakyegele ikyo. Polelo i Kipanga kyegegwe mmwanya mu Lwimiko. Polelo u Mbepo Mwikemo ikubuka ukugomokela nukwakwega Israeli, ukuya kikolo. Kangi kikutwala ikyene pasi ku butali ubu, akabalilo kako u Lusekelo lwa Bwegi lukukindilila, kangi polelo ikutwala Abene ukugomokela kangi ku bumalikisyo bwa kabalilo kala. Une

ndinayo i bolodi yāngi indītu pamwanya, nukuya gwakubagila ukung'wala ikyēne mōsa nukumanyisa ikyēne, akabalilo kāko akabalilo kakwīsa. Polelo u Ntwa ikugomokela nu Nsingiligwa, kangī Israeli ikumbona Umwene. Kangi, o, ko kabalilo kaki aka kisakuyaga!

³⁰ Lilino, bo uswe tukāli nubutalusi ukupinyania iki nkati, kilipo ikimanyiso ikinywāmu iki kyo kyakutabania ku bafunda-kyala na bīngi, na bamanyisi ukusuluka ukukīnda i ngulilo, na bandu ba Kipanga kya Kristi kangī bala aba bikwisa ukupilika iki, ikyo kyo, i Milungu Malongo-mahano-namabili ga Danieli. Uswe tulinago. . . Uswe tukabagila ukubuka pabalipalo pa Busetuli mpaka uswe tukupinya u Nsingiligwa na Israeli palikimo ni Milungu Malongo-mahano-namabili gya Danieli. Kangi lumo, linga Kyala ikwitikisya, polelo ukuti linga Umwene abagīle ukuyoba kwa une mu nkyeni, ukuyoba pa fimo mwa Malongo-mahano-namabili ga Milungu. . . pamo, komma Milungu Malongo-mahano-namabili, lōli i Fungilo ihano-na-ibili isyabumalikisyo. Polelo pa Ndungu ugu gukwisa, une ngugelaga ukwega i Milungu Malongo-mahano-namabili gya Danieli, Pandungu ugu gukwisa, u Ntwa ikwiganaga. Kangi polelo ikyo kisakwīgūla i nyālo polelo, linga Umwene abagīle ukutulōngosya uswe, ukwānda pa fīngi. Ena, uswe tukusyaganiaga ukufuma pala ukukindilila.

³¹ Nkundwe Neville kangī une twīsakubombaga palikimo pa iki, nukubōmba kilikyōsa iki uswe tubagīle ku bukābilo bwa bāndu.

³² Lilino, ukugomokela kunyuma akabalilo kalikosa, uswe tukwiputula ababine, uswe akabalilo kosa tukuoboka ukubomba ikyo. Kangi une lumo ngubōmba ikyēne u lukomano lulilōsa, linga abāndu babine, ukwiputula abēne.

³³ Une ndikulōnda ukuya kangī mma nu kumanyila-ngāni kulikōsa. Muketile, lilino iki kyo iki kyābonīke. Une ngelīle. Kangi une mmenye une mbombile ifindu ifi fisobi; loli une ngelile ukwitugala kifuki ukufwana kwa Kyala, akabalilo kosa, kwa Kyala, umo mo mūmo imboniboni isi syābagile ukuboneka, mūmo isyēne syābagile ukuyapo pa buyo. Abāndu bōpe bābagile ukuyōngésya ifindu, nukungōlēla une pala, ukunsūma unu ukubūka ngīpūte kwa Ntwa, ukulālusyo ko kūgu ikyēne kyāliko. Ngati Jesse āyōngisye imbunda, kangī abalumiana bābūkile pāsi ukummwāga u nsololi, kangī umwēne ābabūlile abēne imbūnda syabōmbile syāgomokile ku kāya. Popāpo bo ifya ngati ifyo, ikyo kyo nubupelesye fili kanunu. Lōli ikyēne kikwēga fīngi fiyo ifya ikyēne, abāndu bīngi fiyo. . . Itolo komma mu buyo bwa pa buyo bo ulu; ikyēne kyo kīsu-kyōsa, muketile. Popāpo ikyēne itolo kikwēga, kikunyumilisa une fiyo ukundepulania mōsa, kangī polelo ukukukyūnga ugwe palapala pa lwēnge akabalilo kōsa, mpaka ikyēne kyāfikile ku buyo. . .

³⁴ Kangi ikyo kyo iki kyātēndíke abakundwe ukwēga i kimanyisyo iki kyālyāndíle, ukuti une nāli gwamumbili Ntwa Yeso Kristi. Kangi uswe tumenye ukuti ikyo kyābagile itolo ukulepulania u Butumigwe bōsa ntupatu, nukutwāla ukutukigw’amahēlu pa Kristi na filifyōsa. Muketile? Popāpo iyo yo nōngwa une nāfimbilisigwāga ukubapa abēne ukuyugānia ukukulumba, ukwīmika ikyēne palapala pa kamokēne, ukubaleka abēne ukumanya ukuti kila kikāli kya Kyala, kila kyāli kya mōhēsi. Muketile? Kangi abēne bo bāndu banunu. Kangi ikyēne kyābonísye abāndu bala bapāpígwe kangi mwa Mbepo gwa Kyala, panongwa yakuti, akabalilo kako abene baketile u Bwanaloli ukwisila mu Lisimbo, abene bagomokile kwa Kyala, katikati, muketile, mbimbibi. Popāpo, ikyo kyānāngísye ikyēne āli Sētāno ikugela ukubōmba ikindukimo na bāndu; abēne bōsa bāli bakyāla, bāndu Bakristi.

³⁵ Kangi ikylene kitendekigwe bingī ba abene bikuyoba kwa une, “Nkundwe Branham, uswe tuli nu lusubilo lwingi mwa ugwe lilino ukukinda mumo uswe twalimo nalo siku.”

³⁶ Nongwa yakuti muketile, iki, ni kikūngilwa iki Kyala āmbēle une, ngimba une āngāli mbombile fiki na ikyo? Nsopile ikisu pa malūndi gāngu, pamo, abāndu. Iki uswe tukukōlēla i *kikolo*, kikaya “kosmos” panja apa, i—i fyakusosigwāpo na fyosa bo ifyo. Une ngusanusya a Bakristi, u mwītiki gwanalōli, uyo yo luketa lwa i. . . Uswe tukuyoba isya *kikolo*, uswe tukulumbilila isya “bandu abapapigwe-kangi,” ikyo kyo iki uswe tukuyobapo, i *kikolo*. Komma itolo aligwēsa panja pala, ikyo kyo kinyanyasi fiyo ni ndope isi uswe tukwītūgalāmo nkisu, ikyo kyo itolo—ikyo kyo itolo lufūmbi lwa kisu ulu lukusanukila kunyuma. Une nguyobapo isya Bakristi abapapigwe-kabubili, abandu aba bo baKristi abanaloli.

³⁷ Une ngugūlila u nnyāmbāla ukunyēla pa une kangi isya kindukimo. Umunduyumo ikwisa kwa une pakaya patali mma, kangi alinkuti, “Ifundo yilayila, iya Kristi ikufunyila pa mfu, na mata Gāke, nukutēndeka akasyesye nukumyātika ikyēne pamwanya pa fisige fya munduyumo.” Alinkuti, “Mumo kyakinyanyasi, nkyabubwāpūfu kila kyāli, kuli Umwēne ukufunyila, ukufunyila amata Gāke pānja pa ndomo Gwāke! Mūmo kisitabwīfyūsi ikyēne kyāli, ukufunya mu lufūmbi, nukutēndeka ikisyesye kya matipa nukubika ikyēne pamwanya pa fisige fya mūndu.”

Une ndinkuti, “Loli umwene agomokile kunyuma ikukēta.” Muketile, ikyo kyo kyene.

³⁸ Kangi u nnyāmbāla yulayula yula! Abēne bāligwile ubugonelo bwa bangelebune pamwanya pala kifuki nu buyo bwāngu, umwe mumenye, i kitubwi kyakōgēlelamo. Kangi—kangi unnyāmbāla yula ali ni tikiti kuli aligwēsa gwa bāna bāke ukubūka ukusuluka mula nukwakōgēlēla nkitubwi kila.

Kangi umwene nu nkasi gwake ikubuka, yópe, nkitubwi kila. Nhobokela une, bakalumbu bangu. Lóli kúko bala abakíkùlu nkati mula bikògèla, kifuki mia yumo gwa bēne, pamo babili, ilisiku lililyōsa; abakikulu, fyosa ifinyanyasi ni findu, kangi abakikulu umwisyugu, nukusuka posa mmisi gala, ifyakinyanyasi fila nu bubwāpufu nkanwa myābo, nukumila ikyēne nukufunyila ikyēne pānja. Une itolo ngulōnda umwēne ukunyēla pa une, muketile.

³⁹ Abēne balinkuti, “Linga—linga Kristi āli nu būmi umwīsyūgu, abēne āngàli bikuya nu Mwēne apīnyīgwe pa nongwa ya kindu kyabubwāpufu kila.”

⁴⁰ Bule isya *ikyó*? Une nsimikisye umwe mukukikōla iki une ngusanusya. Abene bikubuka mulamula nkitubwi kila, kangi bingi ba abene ni mbungo, amasēndo, akasyonono, na filifyosa ifingi, mulamula mula. Kangi itolo ukufuma ikyēne ukwisila a kanwa kākó, na filifyōsa bo ikyo, nukusuka ukusyūngutila nkati mula bo uló. Kangi ikyo kyo kifýūsi, ena?

⁴¹ Polelo, o, mwe, i lisiku ili uswe tulimo nu bumi, nkundwe, kalumbu! Akene ko kabalilo ka Kwisa kwa Ntwa! Kangi i Kipanga kili nu lusūbīlo lumolwene, kangi uló lo Kwisa kwa Ntwa.

⁴² Ena, une ngabagila ukwimika ifindu ifyo; kukayapo nukufūmbwa. I Bāngèli libōmbile lisakisye abēne bisakuyaga apa. Une ngabagila ukwīmika abēne. Loli une ngulonda amasyu gangu pa fisimbigwe Kumwanya, ukuti une nalwanaga ni kyene, akabalilo kako akabalilo kakwisaga ku Bulongi. Une nalwanaga ni kyene.

⁴³ Une ngali ngwitika ukuti ili Bangeli ili lyo Lisyu lya Kyala. Polelo kukayako nakimo ikīngi nkīsu, ikyakukanikana ni Lyēne, kikabagilamo siku ukwīmika Ilyene. Loli ili Bangeli ili apa, ili lyo Bwanaloli, ili lyo Lisyu lya Kyala. Popāpo lilino unko uswe itolo tukwābile nkati igyitu—igyitu—igyitu imyenda gya sitima, nu kungimisa pakabalilo ukulwīla i kiloboko ukyalutēngāno kya Buyo bwa Butūsyo. Kangi—kangi uswe tubagile ukukom’ingafi kilabo kubuyobumo, lóli unko uswe tungimise lilino nukupilikisya ku Masyu ga Tata gwitu Gwakumwanya mumo Umwene ikuyobela kwa uswe ukwisila mu Lisyu Lyake, uswe tukusubila, umwisyugu.

⁴⁴ Kangi ikilo iki, lilino, ugwe tēdekesya lilyōsa ililaalusyo ilinini ili ugwe uli nalyo. Lilino, komma ikindukimo iki kisakufulasya u mundu yumo. Linga ugwe kubomba ikyo, polelo ikyo kyo. . . Une ndikwīsakwāmùla lila, ukwānda itolo, muketile. Loli ugwe, *ikindukimo-ikīngi*, yoba, “Ena, lilino, linga une ngubomba ikindu kimo, ngimba Kyala ikuyoba ukuti uswe tukufimbilisigwa ukubomba iki?” Pamo, umwe mumenye, amalālúsyo ilinini pa ndumbula syīnu. Pamo, “Uswe tuli ni fyabupi fikubopa na uswe, Nkundwe Branham, kangi ngimba

uswe tukufimbilisigwa ukubōmbèla ifyene injila *iyi* pamo injila *iyi*? Pamo, ngimba uswe tukubombaga fiki?” Ikindukimo iki une mbagile ukukwāmula ugwe ukugomokela mu Lisimbo, ugwe uketile. Simba ikindukimo ikinini. Une ngusangulukaga. Kangi linga kikayapo nakimo, polelo une itolo ngwegaga ikimanyisyo kya luko lumo, nukulūmbilīla kwa umwe ikilo iki, u Ntwa itikisyege. Iyi yo pa Ndungu, kangi une njīle. . .

⁴⁵ Pa Ndungu ugu gwākindaga une nālyāndile ukubūka ukukilania ku kāya ka Nkundwe Cauble. Kangi une ndinkupilika i libangala lya kipanga ili likukuba, kangi une ndinkwēnda ukufyūka nukusuluka itolo mu lubingilo. Une ndinkutoligwa ukwimikana nakyo icyene. Ikyo kyo kyosa. Une mbilike umwe, polelo une—une—une itolo ndinkufimbilisigwa ukwisa pasi.

⁴⁶ Popāpo lilino unko uswe itolo twīnamīsye imitu gyītu lilino nukuyoba ku Mtēndeki gwītu, kangi polelo mu lisyu lya lwīputo. Ngimba alipo aligwesa uyu ali nu busūme bwapalubafu? Fyusya itolo ifiboko fyinu, yoba itolo, “Une. . .” Itolo kipela icyene kifumusigwe. Kyala ikumanya iki kili pa ndumbula yāko. Lilino itolo kyūnga ubusume bwāko pa linogono lyīnu.

⁴⁷ Kyala Mwikemo Ukukinda, Uyu apelile Kumwanya na pasi ukwisila mu Lisyu lya kanwa Kāko, ukwisila mu minogono ga linogonelo Lyako, uswe tukwisa mu Kuyapo Kwako, ukwisila mwa Yeso Kristi, u Ntwa gwitu, ukukupa Ugwe ukupalisya kwa fyosa ifi Ugwe ubombile kuli uswe. Kangi uswe tukupalisya fiyo kwa Ugwe, Ntwa, ulubunju ulu, ukumanya apa uswe twīmīle, ukumanya ubuyo ubu uswe tulimo ndubunju ulu, kangi isyambukulu sya kabalilo, kangi isya nkyeni isi sikwisaga. Tumenye umwīsyūgu, ukuti ukwisila mu lipyāna lya Kyala, ukuti uswe tusukīgwe mu Lilopa lya Kalvari, ukuti uswe twitēndekīsye, nu lwitiko mu ndumbula syitu, ukuti tukwagana Nagwe linga Umwene abagile ukwisa umwisyugu. Uswe tukufimbilisigwa ukuyoba, “Pōpe lūlo, isaga, Ntwa Yeso.”

⁴⁸ Kangi uswe tukukēta ubutulwanōngwa bukwlūdika, mpaka icyēne kikuboneka ngati ikīsū kikupepeluka pāsī pa butike bwa butulwanōngwa. Mūmo fikuti ukunwa nu kulagusya, kangi ubulogwe, kangi ubungelebune, kangi, O Kyala, ifyakinyanyasi, kangi ububwāpufu kangi indope sya bāndu. Kangi mumo abene, linga abene babagile itolo ukusyagania, Ntwa! Ngimba abāndu bala, bābo bikufwāla bo lula mu gila imyēnda iminini igyaiyolo imisitakyala, kangi nukusōka panja pala pa lukīndi, ngimba abēne bikusyāgānia ukuti abēne bo nakimo lōli mbani nu lufūmbi, ukuti lumo mu ndungu ugūngi i mbani sisakulyāga umbili gula ugu abēne bikugugwīmīka fiyo? Ngimba abēne bikusyāgānia ukuti kayūbili isakulya ugwēne mōsa, kangi umoyo gwābo gwisakuyaga kula mwa Syēpwa kisita Kyala, kisita Kristi, kisita lusūbilo, gukwībila mu butolwe ubusolofu, ukuya nubupepe

ukupyūtigwa ku Bwīsile Bwāke? O Kyala, tupapo uswe amasyu ga—ga busòke, ukuti uswe tubagile ukusòka umoyo guligosa ugwa bupalapala ubu abene bikusegelélako.

⁴⁹ Yaga na uswe umwisyugu. Tupapo uswe “amasyu ga mahala,” bo yu Solomoni akabalilo kamo ayobile mu Unndumbilili, ukuti uswe tubagile ukuya “bayengi bamahala,” ukuti uswe tubagile ukuya “batimi ba bwībūngānie ubu.” Kangi uswe tukusuma, Ntwa, ukuti mumo uswe tukulondela amasyu agakuyoba, ukuti abēne bābagile ukuya—abēne bābagile ukuya bakalyōto aba bābagile ukukòla indūmbula iyo yili fiyo mu kufūmbwa apa ulubūnju ulu.

⁵⁰ Uswe tutīsa nukwībūngānia pāsi pa buyeleke ubupye ubu umwīsyūgu, itolo ukuti tukētigwe, lōli uswe twīsile apa panongwa yakuti uswe tukuganile Ugwe, kangi panongwa yakuti uswe tukunyonywa ukupilika ukufuma kwa Ugwe. Ugwe uli Nganigwa gwitu uyu uswe tunganile, kangi uswe tukulonda ukupilika a Masyu ukufuma kwa Ugwe. Uswe tukupalisya panongwa ya ifi uswe tutalile tupilike. Ikyene pabutali kisakwitugasyaga na uswe. Lilino tupapo uswe ikiyabo iki Ugwe uli nakyo kuli uswe umwīsyūgu, bo uswe tukugūlila nkyēni pa Ugwe. Uswe tukusuma ikyene mu Ngamu ya Yeso, kangi panongwa Yake. Amen.

⁵¹ Lilino ikyene kyo...[Kalumbu ikuyoba mu ndimi, unkundwe ikulingania—Nsimbi]

⁵² Uswe yūwe bakupālisya kuli ifyakufyūsyā ifi ukufuma kwa Mbepo, abēne bikutubūla uswe nukutusòka uswe ukukētésya a Masyu aga lumo u Mbepo Mwikemo ikuyobaga kwa uswe umwisyugu. Kangi uswe tukamanya itolo iki Umwene ali mbukyūngilo kuli uswe, lōli uswe tukumanya ukuti kukufīmbilisīgwa ukuyapo ikindukimo iki Umwēne ikutwālāga pānja. Lumo ililālúsyo lili pa linogonelo lyāko, ukuti Umwēne isakuyoba ikyēne ukwisila mula. Umwene abagile ukuyoba ikyene ukwisila mu Ndumi ulubunju ulu. Umwene abagile ukuyoba ikyene ikilo iki ku bubombelo. Umwēne, pabuyobumo mula umwīsyūgu, Umwēne yo ikugela, ukuboneka ngati, ikusoka umunduyumo ukukòla a Masyu.

⁵³ Lilino ukusanukila ku Lisyu ilisīmbīgwe, unko uswe tubūke kula mwa Būku gwa Kusòka, ku kimanyisyo kya Sukulu ya Ndungu.

⁵⁴ Ngimba umwe muli nu bubōmbèlo bwa lōsyo? [Nkundwe Neville ikuyoba, “Umma, komma mpaka isala ya ntāndātu amayolo aga.”—Nsimbi] Umma. Ububōmbèlo bwa lōsyo pa ntāndātu amayolo aga.

⁵⁵ Unko uswe tubūke ku ntu gwa 17 ugwa Kusòka, nukwanda ni—ni linandi lya 5, une ngwitika, lya 5 ni lya 6 ilya ntu gwa 17 gwa Kusòka.

Kangi u Ntwa alinkuyoba kwa Mōse, Kindililága pankyeni pa bāndu, nukubēga na ugwe aba bakulumba ba Israeli; kangi ingili yāko, nayīyo ugwe gwātikile ikisōko, ega nkiboko kyāko, kangi būka.

Kēta, Une nisakwīma pankyēni pa ugwe... pa lyālabwe mu Horebu; kangi... gwiswa kutika i lyālabwe, kangi pisakwīsa amīsi ukufuma ku lyēne, ukuti abāndu babagile ukunwa. Kangi Mose aabombile lūlo mbuketelo bwa bakulumba ba Israeli.

⁵⁶ Lilino linga une mbagile ukukōlēla untu unnini gwa Sukulu ya Ndungu, une ngulōnda ukwēga iki ukuya kimanyisyo kuli yakumanyilapo kya lubūnju ulu, *Amayepo-Bwila A Misi Gakufuma Mu Lyālabwe.*

⁵⁷ Uswe tumenye ukuti Israeli bwila āli kyakwegelela kya kipanga. Panongwa yakuti, Israeli aali baandu ba Kyala mpaka abeene baasookile ukufuma mu Igupti, kangi polelo abēne bāli kipanga kya Kyala panongwa yakuti abēne bāli bapāgūligwe ukufuma ku kīsu kyōsa.

⁵⁸ Kangi akabalilo kako uswe tupaguligwe ukufuma ku kisu kyosa, polelo uswe tukwisa ukuya kipanga. Lōli akabalilo kōsa uswe twītabēnie na kyōsa i kīsu, polelo uswe tukaya mma mu kipānga. Lilino une ngusūbila ukuti ikyo kikubūka nalōli mbusolofu, kikukola ubuyo bwāke. Muketile, uswe tukaya kipanga mpaka uswe twīpāgwīle ukufuma ku kīsu. Ukwipāgūla twībēne, ukusōka pānja ukufuma pakati pa bāndu abasitabwēlu, ukubōmba umma na bēne, kangi mungayaga balilani ba mbībi syābo. Ukuya mwiyo koma na basitakwitika, lōli ipāgūla gwimwene ukufuma ku findu fya nkīsu.

⁵⁹ Kangi akabalilo kāko Israeli aali mu Igupti, abene baali bandu ba Kyala. Polelo akabalilo kāko abēne bākōleligwāga pānja, pamo bāli nu kusōka, ukusōka pānja, polelo abēne bākōleligwāga i kipanga, panongwa yakuti ikyēne kyāla pala abēne balipāgwīle bēne ukufuma ikīngi kya kīsu.

⁶⁰ Kangi i lisyu lilalila ilya *kipānga* likusanusya “kikukōleligwa pānja.” *Kusōka*, “ukusōka pānja.” Aligwesa gwa uswe, ukuya Bakristi, ali nu kusōka kumo mbūmi bwītu. Uswe twāli na kabalilo kūko uswe twakōleligwe pānja ukufuma pakati pa bīnītu, ukukōleligwa ukufuma pakati pa bāndu aba akabalilo kamo twālilamīle nabo, nukuya bāndu abakīndāne, ukwēnda na bāndu abakīndakīne aba bābōmbelāga mu njila ingīndāne nukuyoba i njila ingīndāne. Ubwēne bwāli kusōka mbūmi bwītu.

⁶¹ Kinunu fiyo ikyakwēgelēla Israeli ātupēle uswe, isya akabalilo kāko Kyala ābakōlīle abēne pānja. Abēne bāli nu kusōka, kangi balinkusōka pānja pakati pa—pa bāndu ba nkīsu, nukuya kikolo ikipāgūligwe, kwa Kyala, abāndu abaswīgīsyē.

Abene balinkwēnda pāsi pa misyūngulu gya kikota kyākisa. Abene bitugasyaga nukwenda ni Mbanda ingulumba ya Moto. Kangi Kyala alinkubatwāla abēne ukufuma ku Igupti, ukubūka ku kīsu iki Umwēne āfīngile.

⁶² Kangi, mu kusōka uku, abēne bapīgwe undōngōsi ugwamwambepo, undongosi, uyu āli Mōse, u nsololi unkulumba umpakīgwe uyu āli u—u nnyāmbāla unkulumba. Umwēne āli nnyāmbāla gwabunyakyāla, umwēne āpāpīgwe mūndu gwabunyakyāla. Kyāla ālinkōlile umwēne ukufuma kunna, kōpe bo kakāli akabalilo kala; Kyāla ālinsāyile umwēne ukufuma ku lwālo lwa kīsu, ukuya ndongosi ku ngulilo yila, ukutwala panja ukusōka uku ku bandu.

⁶³ Apa akabalilo kamo aka kakindilepo, une nājobile ku bāna banini muno nkipanga, kangi nāli nu bulumbilili ubunini ku bene; nukubabūla, pamo ukupa ikyakwēgelela ikinini kya mumo Yoshebedi, mumo umwēne āliputīle, umwene kangi Amram, u tāta gwa Mōse, isya kubōmba ikindukimo isya kuponesya abāndu. Kangi Amram āyibwene i mboniboni ya Kyala yimile, pamo u Gwandumi, ukusosola kubwa ku kululu, nukumbula umwēne iki kikubonekaga. Kangi u nnīni Mōsa āpāpīgwe. Kangi abēne bakātīlāga mma ingomelesyo sya mwalafyāle, pamo indīlisyo. Abēne bāmenye ukuti Kyala āli ni kiboko Kyāke pa Mōse, kangi ikyo kyamašyaga ikyēne. Uko ko kotalusya. Kisita kupāšya iki u mwalafyāle āyobile, iki ikisu kyāndyāli kyāyobile, iki kalikōsa akāngi kāyobile, abene bāmenye Kyala āli ni kiboko Kyake pa Mōse. Popāpo abēne bakāli bākutīla ukundeka umwēne ukummwābula, mulamula nkati pakati pa ngwīna; akabalilo kako isyene syāli syōsa ndupano itolo pa bāna ba kiHiburi, kūko abēne bāsilyesisyē isyene panja pala ku ngwina. Kangi pōpe Mōse ābīkīgwe mulamula mu ngalaba innini nukutumigwa palapala panja pakati pa ngwīna, palapala panja pakati pābo. Panongwa yakuti, abene bakātīlāga nakimo, abene bamenye ukuti Kyala ali ni kiboko Kyāke pa Mōse.

⁶⁴ Ena, lilino, linga uswe tubagile itolo ukumanya ukuti ikindu kilakila, ukuti u Ndongosi gwitu unkulumba, u Mbepo Mwikemo, Kyala antumīle Umwene, kangi Umwene yo Ndongosi gwitu, kangi kali kyo fiki ikisu kikuyoba, kangi ko kukindapo kuki abene bikubaseka umwe nukubūgila umwe, uswe tukukongesya u Ndongosi gwitu! Kyala ātumīle u Mbepo Mwikemo ukuya Ndongosi gwītu. Muketile? “Akabalilo kanini kangi i kīsu kitikumbonaga Une kangi mma. Lōli umwe mwisakumbonaga Une, kabuno Une ngwisakuyaga na umwe, mope nkati mmyinu, ku bumalikisyo bwa kisu.” Polelo, u Ndongosi gwitu unkulumba ali na uswe, u Mbepo Mwikemo. Lilino uswe tukufimbilisigwa ukukonga u Ndongosi uyu kangi ukubomba itolo mumo Umwene ikuyoba tubombege. Kangi u Ndongosi uyu atisakututāgāmo siku uswe ukufuma ku njila, Umwene isakutukuyungaga uswe mulamula mu njila ya Lisimbo

akabalilo kosa. Loli Umwene atisakubukaga ku lubafu *lumo* ulwa kindukimo, kangi ulubafu *ulu* ulwa kindukimo. Umwene isakusyāla mulamula ukutalula mu nsebwe gwa Masimbo.

⁶⁵ Kangi Mōse āli nayo i njila ukuti umwene āyaga pakwegwa Israeli, nukukonga polelo palapala ukukilania i Nyanja Ingeseфу, palapala ukukilania Yorodani, mulamula mu kisu ikifingigwe, mulamula panja ukukinda ndulangalanga. Ikyēne akāli Mōse uyu āsōkilepo pa bugoloke. Ikyēne akāli Kyala panja pa bugoloke. Ikyēne bāli bāndu panja pa bugoloke, aba bātēndike ulutamio. Polelo, unko uswe twinogone isya findu ifi lilino. (Nswaga une.)

⁶⁶ Mōse, ukuya ndongosi umpakigwe. Kubumalikisyo, akabalilo kāko umwēne ānāngisye ku bāndu, ukwisila mu fimanyilo ni fiswigo, ukuti Kyala mwēne ābagile ukubōmba, umwēne ābōmbile ifimanyilo ni fiswigo ifi pankyeni pa bakulumba ba Israeli, kangi pankyēni pa Israeli, mpaka abēne bālikutisigwe ukuti uyu Mōse āli mpakigwe yula uyu āyaga pakusōsya abēne panja pa kisu iki, ku kisu ikinunu kila iki abene bāfingiligwe. Polelo akabalilo kako abene baketile ifindu ifi ifikulumba ifi Mōse aabombile mu ngamu ya Kyala, abene bāli bakwīgāna ukumkonga umwēne. Kangi umwēne abēngile abēne pānja, ukubalōngosya abēne ukukinda i Nyānja Ingeseфу, ukukilania kula, pāli pa kisu ikyūmu, kangi mu njila ya lulangalanga, iki kikusanusya akabalilo ka ngelo.

⁶⁷ Akabalilo kāko umwinitu yumo ikwambilila Kristi ukuya Mpoki gwake, kilikyosa kili pa mwanya pa nyumba. Lōli, bo unnyāmbāla uyu akāli akabagila ukwisa mu lōsyo lwa Mbepo Mwikemo, u mūndu uyu, umwēne tāsi ikufimbilisigwa ukuya nu lutēndēko lwa kukēmesigwa. Umwēne ikufimbilisigwa ukuya na kabalilo ka kugeligwa mbūmi bwāke. Mwēsa ba umwe mwāli nakyo ikyēne. Umwēne āli nako akabalilo aka akakugeligwa. “Umwānundumiana aligwēsa uyu ikwisa kwa Kyala, yo ikyākwānda ikukyapigwa, ikukomigwa, ikutikigwa. Kangi linga uswe tukabagile ukwikasya ukukomigwamo, polelo ikyene kikunangisya uswe tukaya bāna ba Kyala; uswe twe basigwāna, kangi komma bāna ba Kyala,” ili Bangeli lyāyobile. Lōli linga uswe tubagile ukwīma u lufundo, ukumanya ukuti “ifindu fyōsa fikubōmbela palikimo ku bununu ku bene aba banganile Kyala,” polelo uswe twe banabalumiana kangi banabalindwana ba Kyala, polelo Umwene ikutufūnga uswe nu Mbepo Mwikemo mpaka i lisiku lya kutabuligwa kwinu. Muketile, ulo lo lufūndo, ukululumbula, i kīndu uswe tukukīndāmo.

Kangi Israeli, ukuya luko lwasyambukulu, āfimbilisigwaga ukwēga u lufūndo ulu.

⁶⁸ Lilino, akabalilo kako abene bāli kula ku Igupto, kangi Kyala alinkutuma Mōse. Kangi umwēne alinkubālūla pānja

i ngili, kangi imbani ni ngolo sikwisa pa kipalo. Umwene agolosya panja kubwa lisuba, kangi ikylene kyabukile pasi. Umwene alinkugolosya iyene pamwanya pa misi, kangi agene galinkusanuka ku lilopa. Fiki, Israeli ali kula mu Kenani... ukukilania mu—mu Goshen, itolo ukuya na kabalilo akalwimiko; ilisuba likalisilemo siku pasi, ifiswigu siku ukubatika abene; fiki, abene bali itolo na kabalilo kalwimiko!

⁶⁹ Itolo ngati umwe mwabombile akabalilo kaho umwe akakwanda mwapokigwe. Kilikyosa, injuni syalimbile nubukindane, kangi aligwesa ali nyafu. Kangi, o, mwe, mumo itolo filifyosa fyali finyafu akabalilo kaho ugwe ikyakwanda upokigwe! Polelo kakwisa akabalilo ka kugeligwa, u kufundigwa, akabalilo kakukemesigwa, ukwikemesya gwimwene ukufuma ku findu fya nkisu, “ukulambalika palubafu amabusito aga naloli fiyo nubupepe gikutukamandania uswe.” Ugwe, u nnyambala, gwafimbilisigwaga ukuleka ukukwesa kwako, ukuleka ukunwa kwako, ukuleka ukubuka kwako ku kyumba kya bukinilo, isekelo syako sya lukino-lwa-kilo-kyosa kwa makadi. Fyosa ifindu ifyo, ugwe gwafimbilisigwaga ukwikemesya gwimwene ukufuma ku fyene, nu lwitiko mu Lilopa lya Yeso Kristi. Ikemesya gwimwene! Umwe bakikulu mwafimbilisigwaga ukuleka inywili syinu ukukula panja, ukutalika amadiresi ginu, nukubombela ngati nkindane ukukinda iki umwe mwali. Akabalilo kakukemesigwa! Utubalilo twingi abene babagile ukumsambukila nukugomokela; ena, uyo akaya mwana gwa Kyala, muketile. U mwana gwa Kyala ikubonekela ukutalula ku Kalvari, kangi amenye ukuti ikylene kyo kya bununu bwake.

⁷⁰ Popapo polelo ingongano yila ya kabalilo, kula ko kuko ukugwa ukukulumba kukwisa, mu Israeli. Akabalilo kako akabalilo kakwilundika-nkati, polelo abandu balinkwanda ukugwa, ukufuma ku lubafu lumo ukubuka ku lungi. Polelo mu nyangalo syabo, “Ena, uswe tukunyonywa uswe twali twagomokile kula mu Igupti. Imyoyo gyitu gikubenga unkate umpepe ugu.” Mmasyu agangi, linga une nabagile ukwega ikylene musyambukulu lilino, ikyo kyo iki abene bayobile.

⁷¹ Lilino mu lisiku lya mwisoyu, ikylene kikuyaga, “O, ulwa kilo kilikyosa ikya Kitatu, ulukomano lwa lwiputo! Ulubunju lulilosa ulwa Ndungu, ukugomokela ku kipanga! Ngimba uswe tukupilika fiki? Ikindu kilakila; undumbilili ikwima mmwanya nukulumbilila; inyimbo; bukaga nkyene ukugomokela.” Muketile, polelo ugwe itolo kuyaga pa lukindi lwa mbombo. Ugwe ukaya mwiputi. Umwiputi ikubuka kula ku kwiputa, ukwilingania mwene pankyeni pa Kyala gwake, ukuntufya Kyala panongwa ya bununu Bwake; ku Lisyu lililyosa, umwenemilisa ku Lyene.

⁷² Itolo ngati mbombo ya lugano. Linga ugwe gwabukaga nu ndindwana panongwa yakuti ugwe gwamenye iyene yali

mbombo, pamo ugwe kubuka nu ndumiana, akabalilo kako ugwe gwāli nkeke. “Māma ikulonda une ukubuka nu miana yu, loli une itolo ngabagila ukwima umwene.” Ugwe utikukaba nakandu nakamo aka umwene ikwisa ukwagana na ugwe. Pamo, linga iyene yo njila yilayila ukufwana nu ndindwana ku ndumiana, pamo ndumiana ku ndindwana. Ugwe kubuka nagwe umwene, umwene ikukukima ugwe; mama ikulonda ugwe ukubuka nu mwene panongwa yakuti umwene yo luko lwa ndindwana yu mama iganile. Muketile, ikyēne kikukukima ugwe; nayimo imbombo ya lugano. Lōli ugwe utikupāsyā, ugwe utikulōnda ukusuka mōsa, ugwe utikulōnda ukubūka ukwagana na umwēne. Kangi ikyene kyo . . . Fiki, ikyene kyo kindu kinyali. Kangi akabalilo kako umwene ikwisa ukwagana na ugwe, mwe, ugwe itolo angali kubopela, buka ku kaya.

⁷³ Iyo yo njila yiyo ikyene kiyilile akabalilo kako ugwe, “Nongwa ya fiki umwene ikulumbilila akabalilo katali fiyo? Bule isya findu fyosa *ifi*, na filifyosa?” Muketile, ugwe ukaya mu lugano.

⁷⁴ Loli akabalilo kako ugwe naloliloli kwītulika ku Lisyu lililyosa, mumo u Mbepo ākupele ugwe ubusoke ulubunju ulu, muketile, “Ukwītulika ku Lisyu lililyosa.” Ikyo kibagile ukuya iki Umwēne afumile pakuyoba kwa ugwe. Kolelela kula! Ubwene bo Bumi Bwasyepwa, i Lisyu lililyosa ilya Kyala. Ubwene bo buhofu ukubuka ku kipanga, pāsi pa kayilo kalikosa. Kali ukwēne kupīle, kutalalalifu, basitakupāsyā, kali abāndu bikūmana, ukwīlūmbūsyā, kilikyōsa abēne bikubōmba, ubwene bo buhofu ukupilika i Lisyu lya Ntwa. Polelo ugwe uli mu lugano akabalilo kala na Kristi, muketile, ugwe gwīganile ukubuka ku kipanga.

⁷⁵ “Ena, luuki, apa ulwēne lo ulubunju lwa Ndungu kangi, Une ngusakisyā uswe tukufīmbilisigwa ukōsyā abakeke bala nukubūka ukusuluka kula. Mwe, ikyēne kikukima!” Muketile, ugwe ukaya mu lugano.

⁷⁶ Lōli linga ugwe naloliloli uli mu lugano, ugwe itolo ukabagīla ukugūfla mpaka pa Ndungu kulubunju kukwīsa, ugwe kufīmbilisigwa ukufika pāsi pala na bēne. Kangi uswe tukufika, nukusōkāpo . . . Abāndu ba Kyala, abēne batikukukima ugwe. Fiki, abēne bo—abēne bo bakundwe na bakalumbu. Bo mūmo une nālisibile ukuyoba, “Ugwe ukufika ukuya nkafu bo kindongwa kya Mapemba pa lubunju ulutalalalifu.” Ikyēne—ikyēne kitikubopa, ikyēne kikwīma palikimo, umwe mumenye, kikwīkolanā palikimo. Lilino, ikyo kyo bulingānio bwamatingo, lōli ikyēne kyo—ikyēne—ikyēne kyo kugela ukukwītikīsyā ugwe ukumanya iki une ngusanusyā, umwe muketile. Ugwe kwīkōla palikimo. Kangi linga ukwene kukutalalapo pingipo, po abēne bikwīkola pingipo. Kangi iyo yo njila ikyene kikulōndīgwa ukuya na uswe. Abatalele . . .

Akabalilo kāko abīnitu ba nkisu utāgigwe,
Pōpe kifukipo ku Mwēne ikolelelāga!

⁷⁷ Kangi iki uswe tukukigana, yumo nu nnine, yikaya panongwa yakuti uswe tuli munduyumo; loli ikylene yo Kristi mwa yumo nu nnine, ukuti uswe tukugana, umwe muketile. Ikyene yo Kyala uyu ali mu bundu bwitu, ukuti uswe tukugana. Lilino uswe tukwiyela ukwisa palikimo. Uswe twalisibile ukwimba ulwimbo lwaiyolo:

Sayigwa siyege imbinyilo iyi yikupinya
Indumbula syītu mu lugano Lwakikristi;
Ubulilanisi bwa linogono lya bakamu
Buli bo bula bwa ku Mwanya. (Muketile?)

Ubwinake bwa minogono ga bakamu
Buli bo bula bwa ku Mwanya.

Pankyeni pa Kikota kya Tāta gwitu,
Uswe tukōnelela inyiputo syitu isyakwīyūmīla;
Ifyakutila fitu, isūbilo syītu, ifyakulōnda fyītu
fili kimo,

Ubusūbisi bwītu kangi imbākisyo syītu.

⁷⁸ Muketile? Ena, nkulumba! Akabalilo kako yumo ali nu lusayo, uswe twesa tuli bahobofu isya ikylene. Akabalilo kako yumo ikusulumania, uswe tukusulumania nu mwene. Uswe—uswe tukulonda twesa ukuya palikimo. Lilino iyo yo njila uswe tubagisenie ukuya.

⁷⁹ Kangi iyo yo njila iyi Israeli ābagisenie ukuya. Lōli ikyēne kilinkuya kyabusito, “O, iki gwaiyolo nkate umpepe!” U nkate gwa Bāndūmi, “Mulimōsa, kyo fiki uswe tukupākisya isya ugu ugwaiyolo u nkate umpepe? Imyoyo gyītu gikibēngile ikīndu iki! Kangi kilikyōsa kyo kisobi. Kangi—kangi a manna gaiyolo aga aga gikugwa panja ikilo kilikyōsa, fiki, uswe kinunupo tuyege na fimo ifitūngulu ifikali kangi ifitūngulu ukufuma ku Igupti.” Umwe muketile, indumbula syabo sikālītendekesyē ku njila.

⁸⁰ Kangi akabalilo kako unnyambala pamo unkikulu ikwānda ukwilumbusya ukufwana nu kubūka kipanga, abēne bikwisa ukuya bakatale fiyo ukubuka ku kipanga, abene bakitendekisyē ukubuka ku njila. Uko ko kutalusya. Kilipo ikindukimo kitamisyē pa buyobumo.

⁸¹ O, akabalilo kako ugwe unganile Kyala, kangi kwinogona ugwe kubukaga Kumwanya, na fyosa ifya ugwe kuyaga palikimo:

Bo bulilanisi buki, bo buhobofu Bwakyala
buki,
Ukwigēmekésya pa lukōngi ulusitakumalika;
O, lo lutēngano ulusayigwa luki nu Ntwa
gwāngu kifuki fiyo,
Ukwigēmekésya pa kiboko Kyake ikyabwila.

Kyo fiki i . . . Uswe tukwimba inyimbo sila.

Uswe tukuyabana isoka syatwesa,
Imisigo gyitu gyatwesa tukupimba;
Kangi akabalilo kingi kuli yumo nu yungi
likusululuka
I lisosi ilipelelelakisa.

Akabalilo kâko pakati tukutapukana,
Ikyene kikutupa uswe nkati ubabe;
Lôli uswe pôpe twisakulungisigwa mu
ndumbula,
Nukusûbila ukwaagana kangî ku lukomano
lwa lwiputo akabalilo kakoonge. (Ena,
nkulumba, tukaali tulungisenie mu
ndumbula!)

⁸² Lilino ugwe kwitendekesya ku njila, muketile, ugwe gwitendekisye ukubuka mu Kisu ikifingigwe. Utubalilo twa ngelo, apo bulipo ubuyo ubupalapala; ululangalanga, utubalilo utwa ngelo.

⁸³ Israeli, nkabalilo kâke aka ngelo, umwene alinkufika ku kûmana nu kwilumbûsya yumo nu nnine, kangî ukubenga pa nkate. Kangî abene bâlondâga ukugomokela ku Igupto.

⁸⁴ Kangî polelo abene balinkwanda ukwilumbusya ukufwana nu ndongosi gwabo. O, abene bali nu lutende ukuti umwene âlongolelâga abene kubusobi; ukufuma pâpo umwene âlinângisye mwene ukuya ndongosi, kangî Kyala âsisimikisye ukuti umwene âli ndongosi. “Mulimôsa, lumo uswe twâbômbile panândi panini mbumilisi. Kangî—kangî lumo uswe twâsokilepo, lôsa pa kilundi ikisobi,” pamo, ikindukimo bo ikyo, muketile, abene bângalaga ukulwâna na Kyala kangî ukulwâna na Môse, Kyala kangî undongosi Gwâke.

⁸⁵ Lilino akabalilo kako uswe tukufika ku buyo, ukuyoba, “Une ngamanya kali i Lisyu likusanusya *Iki*, pamo mma,” kangî, “Une ngamanya isya Mbepo Mwikemo; Une ndi panini ndonda-busobi bwa Ikyo. Une mmenye abangi aba bakaya.” Ena, bukaga nkyeni ku Igupto. Muketile?

⁸⁶ Lôli linga ugwe naloliloli gusisimikisye ukwitugasya pa nsebwe, ima palapala na Ndongosi uyu, u Mbepo Mwikemo, itugalaga palapala ni Lisyu. Kangî linga ugwe kwitugasyaga na Mbepo, Ikyene kikukuyunga ugwe mu Lisyu. Uko ko kutalusya. Ikyene kikukwegaga ugwe palapala pâsi pa lukindi, injila ya Lisyu. Kangî komma ukutîla Ikyene. Ikyene kitisa kufulasya nakimo, Ikyene itolo kisakukutûlaga ugwe linga ugwe kufulasigwa. Ikyene kisakubûmbulusya fyosa ifi fikufulasya, u Mbepo Mwikemo ikubombaga.

⁸⁷ Lilino uswe tukusyâgânia ukuti, môsa mu nsebwe ugu, ukufuma pâpo abene bâfikile ukuya bo ulu, abene bikwisa ku buyo bwa Horebu. Kangî H-o-r-e-b-u, Horebu, polelo uswe

tukusyāgània . . . Unko uswe tubongotole ingamu yila pāsi. Apo po pāpo i—i ngamu *Horebu* yikusanusya “ubuyo ubūmu” pamo u “lulānga.”

⁸⁸ Kangi akabalilo kāko uswe tukusōkāpo pa bulilanisi yumo nu nnine nkipanga, kangi ukufuma ku bulilanisi nu Mbepo Mwikemo, ikylene kikutwāla uswe ku buyo ubūmu, u lulānga, nakimo kyābūmi, kilikyōsa kili ni mifwa pa kyēne. Muketile, u—u lulānga, akapatu akanini ka kōnje nu mwifwa gwāke pa kyēne. Ngimba ugwe gwāmēnye iki kila kili? Ilyo lyo lyāni ilitōfu ilinīni līlyo likāli nago amīsi nagamo, ilyēne itolo lilinkwīniembania lyēne lōsa nukubukafupo mpaka ugwēne go mwifwa. Kangi akabalilo kako ugwe kumbona umunduyumo bo yula, lumo ugwene go moyo umpala ugu gubagile ukoneleligwa kanunu, gwābagile ukuya litōfu ilinīni ilyāni pa ikindukimo. Loli mbuyo bwa ikyo, ikylene kyo kyaliniembile kyene mpaka ikylene go mifwa, itolo ukufulasya ku kilikyosa, umwe mumenye, ukwaga ubusobi. Ikindu kyene iki ikylene kikufūmbwa go misi itolo. Ikyo kyo kyosa. Ikyēne itolo ikye itolo kikufūmbwa u—u luyigo, pamo ukubulutuligwa, ubupūpwe ukufuma ku Ntwa. Ikyēne kisa—ikyēne kisakwībālūla kyēne panini, linga ugwe itolo kwisakubika ikyēne ku mīsi.

⁸⁹ Lōli, apo po pāpo bala bābo bikwītūgāsya mbuyo bula bikufimbilisigwa ukukubilwa nu bwītugasilo bwa buyo bula. Kangi bala bābo bikunyonywa ukwītūgāla mu luko lwa busyūngutilo, ubwa kūko kilikyōsa kyo itolo kyakulāsa nu kwilūmbūsyā, nu kūmāna nu kubila bo ulo, mulimōsa, ugwe kwisa itolo kwītūgāla pāsi pa busyūngutilo bula, ikyo kyo kyōsa. Lōli uswe tutikufimbilisigwa ukwītūgāla kula, ikyēne kikaya kyākulōndigwa kuli uswe ukusyāla kula.

⁹⁰ Lilino, u *Horebu* uyu bwāli buyo kūko Kyala āli gwākusulumania na bāndu, panongwa yakuti abēne bābelāga mbuyo ubu kangi bāfikile mu kayīlo aka. Kangi Umwene alinkubatwala abēne kulakula ukusyūngutila ku kyene, panongwa yakuti abēne bātōligwe ukwēnda mu njila. Abēne bāsōkilēpo pa—pa nsebwe unnywāmu, bāsōkilēpo ukukilania pa unsebwe ugu gwapalubafu. Kangi polelo ikyēne kilinkumpela Kyala ukubōmba ikindukimo iki kyāli kitīlisye. Umwēne . . . Ikumpela Kyala ukuya na Mōse ukwēga i ngili iyi umwēne alōngile nayo i kīsu, nukutika i Lyālabwe, ukutwāla pānja amīsi.

⁹¹ Lilino, kilipo ikimanyisyo ikimogi apa linga uswe tubagile itolo ukupilikisya ikyēne, muketile. Kangi panongwa yakuti fikuti uswe tukufika fiyo panja pa lubātiko, kangi bapinyigwa ni kīsu, ni findu, ikylene kyapelile Kyala ukwega u bulongi bwa kisu kyapasi nukutika u Mwanundumiana Gwake Mwene ni kyene, pa Kalivari, ukuti uswe tubagile ukubūka bābūke. Ngimba umwe mukukēta iki une ngusanusya?

⁹² Lilino, ukuti ubēge abāndu aba ku mīsi gamo, ukufuma pāpo abēne bāfikile ukukīlania kula, ubuyo ubūmu ubu bwatendekīgwe ukuya Kalivari. Kangi pala Kyala alinkumbula Mōse, Umwene alinkuti, “Ega ingili na bakulumba, nukusooka nkyēni, kangi Une ngwimililaga pa Lyālabwe pankyeni pa ugwe.” Kangi i Lyalabwe ili lyāli Kristi. Kangi Mōse, ni ngili iyi umwene ātwele u bulongi pa kisu kya Israeli, ālyēgile ingili iyi yilayila nukutika amabulōngi ga Kyala pa Lyālābwe. Muketile? Umwēne ālyēgile imbibi sya bāndu pa ngili iyi. Iki, umwēne abagile ukuti ātikile abāndu. Mbuyo bwa kutika abāndu, umwēne ātikile i Lyālabwe. Kangi i Lyālābwe, ukwisila mu mbombo ya Kyala, lyātwele ubupoki, lyatwele a misi ukubuka ku bāndu aba bikupyūtigwa. Ilyēne lyātwele ubūmi ku bāndu aba bikufwa. Kangi ikyo kyo iki Kyala ābōmbile ukwisila mu kwēga i Yāke—Yāke ulukili lwa ngili ya bulōngi, nukuniēmba imbibi syāngu ni mbibi syīnu ukusyūngitila ingili iyi; akabalilo kāko iyēne āngāli yitutikile uswe, lōli iyēne yilinkutika Kristi; ukuti ukufuma ku Mwene gikusōka panja *amisi*, iki kikusanusya “Mbepo,” u Mbepo Mwikemo āsokile panja ukufuma ku Mwene, ukutupa uswe u Bumi. Lilino uswe tuli nabo u Būmi Bwasyēpwa. Lilino, i Lyālabwe lila lyāli Kristi. Lilino uswe tukulōnda ukukētésya.

⁹³ Une mfibwēne ififwāni fīngi fiyo ifyamahala ifya Lyālābwe ili. Une nkibwēne kimo mwa fyakuswīgīsyā ukukīnda, pakaya patali mma, mpaka kūko kālipo a—a kabwe akanini kalāmbalele pala pa mwanya pa kāmba. Kangi—kangi Mose abagisenie ukuti ātikile aka lyālabwe aka, kangi Israeli aali pasi pala ni kikopo kya kyāyi, bikwīyāgila bēne agākunwa ukufuma ku kanyāfila akanini aka kāgwāga ukufuma mu lyālabwe ili. Lilino ilyo lyo itolo līnogōno lya mūnduyumo.

⁹⁴ Lōli akabalilo kāko i Lyālabwe ili lyātwele pānja amīsi Gāke, bālipo ukukīnda maelifu-elifu mabili abāndu, palubafu lwa ngāmbako, ingamila, na filifyōsa ifīngi ifi fyānwaga amapīpa ga mīsi ukufuma ku Lyēne. Ulwēne lwāli lusōko lwāmōgēsyo ulu lwāsōkile pānja ukufuma mula!

⁹⁵ Iyo yo njila abēne bikugela ukumpela Kristi, u Mbepo Mwikemo umwīsyugu. “Akēne ko itolo kākunyāfila akanini.” Muketile, itolo ukufwana ukutendeka ugwe ukwitika ukuti aliko Kyala. Umma.

⁹⁶ Ikyēne kyo bwīngi bwa Mīsi! Davidi āyobīle, “Ikikopo kyāngu kikusefuka!” Ikyēne kyo itolo busefuke bwa Mbepo Mwikēmo.

⁹⁷ Abāndu bikukitīla Ikyēne. Abāndu bamo bikuyoba, “Ena, une ne itolo panini ngutīla ukuti une ngubombaga *iki* pamo *ikyo*, pamo linga une nguboneka ngubūka panini mbusolofu fiyo. Une mbagile ukukunāngīsyā ugwe umunduyumo ābūkile panini pabutali fiyo.” Lōli ugwe nalōli utikusōsolāmo siku ku yula

akābūkile pabutali ukufwana. Muketile? Ena, bule isya bēne bābo bakābūkile pabutali ukufwāna?

⁹⁸ Lilino, uswe tufimile pakuya na bāndu bamo aba bāfikile mu mbili, kangi balinkusōkapo pa kilūndi ikisobi. Kangi—kangi komma Kyala, loli abandu bāli . . . Panongwa ya kisita bulōngōsi bununu, na fyōsa bo ifyo, balinkusōsyāpo abēne pa kilūndi ikisobi, kangi abēne balinkubūka mbūmilisi. Kangi polelo ikīsu kyōsa, u mōhēsi ukusōsolela abēne, “Muketile ikyo! Muketile ikyo!”

⁹⁹ Mulimōsa, unko une nīme ulubūnju ulu nukusōsola ku nyumba ku aba makalongo ga maelifu-elifu utubalilo ukōngelelāpo aba nasiku bākatēndike nukwānda mma. Bule isya abēne? Muketile, kēta a kayīlo kābo. Kēta u miana ngati Eichmann umwīsyūgu, ni kyapamwānya ukukīnda . . . Abēne bikuyoba, “Abapentekosti bo basitabūndu kangi basitakayīlo, kangi abēne bakaya bamanyi,” na fyosa bo ifyo. Kēta Eichmann, yumo mwa banyāmbāla abamanyi bapamwanya ukukīnda nkīsu. Kangi umwēne ābīkīle ku bufwe, abāna maelifu-elifu ntāndatu na bakīkūlu na banyāmbāla, imyoyo maelifu-elifu ntāndatu. Ugwe utikulonda ukusōsola ku mundu yumo bo yula.

¹⁰⁰ Lōli umwīnitu unnīni yumo uyu akābagile ukubala, kifuki, ākōlile lumo ingamu yimo iya i Bāngēli nubusobi, kangi, pamo lumo āyōbile ikindukimo pamo ābōmbīle ikindukimo nubusobi, pamo ābōmbīle i ngilanio yimo, ikalatasi sya nōngwa sikulōnda ukusīmba ikyēne lōsa mulimōsa, nukuyoba, “Abēne babagile ukuya basitakusūbiligwa.”

¹⁰¹ Polelo linga ikyo kikabagīla ukusūbiligwa, nongwa ya fiki ubumanyi, ifindu na bamahala aba abēne bali nabo umwisyugu? Kēta Adolf Hitler. Kēta amabongo ga kīsu umwisyugu. Bakēta abene. Ubuyobelo bwaiyolo, “Umposya gwa lisēkwa go gwa libāka.”

¹⁰² Ikindu iki ugwe kufimbilisigwa ukubomba ko kubagila, ukwisila mwa Mbepo Mwikemo, ukupāgūlania iki kyo kitalusye kangi kisobi, nu kwēga iki kyo kitalusye kangi kisobi.

¹⁰³ Lilino, uswe tukusyāgānia ukuti u Kalivari uyu ūyo abēne bāli nagwe, kangi amīsi ga būmi gasefukaga pānja kuli abāndu.

¹⁰⁴ Lilino, abandu bamo bali nakyo pa ndumbula syabo nu bwīnogonelo, ukuti gwēsa Israeli ānwīle, kangi polelo abēne batwēle ingamila nu kupinya ifyakubopesya ifalasi syābo, na fyōsa bo ifyo, nukwēga abāna bābo nukwēndela nkyēni ukwīngila mbuyobumo ubūngi, kangi balikulileka i Lyālābwe pala, likunyāfila. Ikyo kyo kisobi.

¹⁰⁵ I Lyālābwe lyābākōngāga abēne, kangi amīsi gala gabākōngāga abēne. Lilino mu Bakorinti Bakwanda, untu gwa 10, une ngusubila, kangi ilinandi lya 11, umwe mubagile ukukyaga ikyene, ukuti “Lila i Lyālābwe lyālinkongile Israeli.” Kulikosa abēne bābūkāga ukufuma ilisiku lila ukukindilila,

i Lyālábwe lyābūkile na bēne, kangi amīsi galinkukōngésya abēne.

¹⁰⁶ Kyo kyākwēgelèla kimogi nki, kangi i—i ngolelelo imogi ni ngimu kuli u mwītiki umwīsyūgu, uyu amenye ukuti i Lyālábwe lila akabalilo kamo lyākomīgwe, a Mīsi gala aga akabalilo kamo gālyōnelile pānja ukufuma ku Kalivari, gikubūka na uswe kulikōsa uswe tuliko! O, mwe! Ikyēne kikaya ko kubūka ukugomokela ku buyo būmo, nu kuyoba, “Mulimōsa, uswe nalōli twāli ni lisiku lya Mīsi bo pakiyolo, ukukilania kula.” Uswe tulinago a Mīsi umwīsyūgu, papapa apa, panongwa yakuti i Lyālábwe lila lyāli Kristi! Kangi Kristi yo yuyo mmayolo, umwīsyūgu, na bwilanabwila.

¹⁰⁷ Muketile, i Lyālábwe lila lyālinkōngīle Israeli. Abēne bakākōngisyēmo siku i Lyālábwe, lōli i Lyālábwe lyākōngīle abēne. Amenī. Israeli alinkubuka pa njila yabo. Abene bāli nakyo loli ikindu kimokyene ikyakubomba, uko ko, kyūnga mbugoloke i njila, palapala ukutalula kula nkīsu ikifīngigwe. Kangi i Lyālábwe na mīsi fyābakōngīle abēne.

... i *Lyalabwe* likukonga *abene*: . . .

Bakorinti Bakwanda ikubabula umwe lulo, unto gwa 10. Umma ndaga.

... i *Lyalabwe lila lyāli Kristi*.

¹⁰⁸ Kyala ālyēgīle amabulongi ga bāndu nukugabīka agēne pa Kristi, nukuntika Umwēne. Ngimba umwe mwākētesisye, bwālipo ubulāsūke mu Lyālábwe, ukufuma pala ukubūka nkyēni? I Lyālábwe lyāli nabo ubulāsūke mu lyēne, kūko Mōse ātikile. Kangi Kristi āli nu bulāsūke, akabalilo kāko Umwēne ātikīgwe, “Umwene afulasigwe panongwa ya ngilanio syitu, kangī ni fulale Syake uswe twagāngwike.” Ukufuma ku Būmi bula gakusōka panja a Mīsi ga Būmi aga uswe fiyo tukwīkyēla umwīsyūgu!

¹⁰⁹ Lilino, ukuti ukabe u Būmi ubu, kumbukilāga, u Būmi bwa Kristi bukusyāla ni Kipanga. Aleluya! O, linga uswe tubagile ukungimisya aminogono gitu pala ku maminiti kalongo aga gikwīsa! Kristi atikusokapo pa Kipanga. “Une nguyaga na umwe bwila, pope nakubumalikisyo bwa kisu.” Ikyene kyo bandu aba bikundeka Kristi, komma Kristi ukubaleka abandu. Abandu bikukileka Ikyene, ukwisila mu kusitakwitika kwabo. Abene bikundeka Kristi, komma Kristi ukubaleka abandu.

¹¹⁰ Israeli ālekile i kisōko, komma i kisōko ukundeka Israeli. Muketile? Kabuno, i Bangeli likupabwelu ukuti, “I Lyalabwe na misi galinkukonga Israeli.” Lyābakōngīle abēne! Kulikōsa abēne bābūkile, Ilyēne lyābūkile, lyōpe.

¹¹¹ O, une ngulōnda, ulubunju ulu, linga uswe twāli na kabalilo, ukusanukila ku ntu gwa 1 gwa Yoshua, kūko Umwēne āyobīle, “Kulikōsa i njayo sya malūndi gīnu gisakukanya, Une mbapēle

umwe. Kulikosa kuko ugwe kubukako, u Ntwa Kyala gwako ali na ugwe. Komma ugwe ukuntila unnyambala aligwesa. Yaga nkifu! Itolo paliposa apa ugwe kutendeka ilikato, Une ndi palapala na ugwe, kali icyene kili poki.” Kyala ikubuka nu Yohua!

112 U Kyala yulayula ikubuka ni Kipanga Kyāke ulubunju ulu. Unko uswe tunwe ukufuma ku Nyībúko iyi kula. Kulikosa kuko ugwe kutendeka ilikato, pala po pāpo Kyala isakuyaga palapala na ugwe, ku kōnelelamisi nkati nukukupa ugwe Bumi. “Une nguyaga na umwe bwila, kōpe nakubumalikisyo bwa ngulilo.” Kristi yo yuyo mmayolo, umwisyugu, na bwilanabwila. Indagilo sya Kyala.

113 Lilino ugwe kuyoba, “Polelo, Nkundwe Branham, nongwa ya fiki icyene ukuti uswe tutikobomba ifindu polelo ifi uswe tubagisenie ukubomba? Ngimba icyēne kyo fiki ifikungilwa fyītu ni findu nkipanga fitikwīsága ku lāngi yāke, kūko icyēne kibagile ukuya? Ngimba icyene kyo bulebule ikipanga kiyitu kitikufyuka mmwanya ku buyo kūko icyene kibagile ukuya?” A bānda, nkabalilo aka ngelo, bikugwa ukusōkàpo mūmo Israeli ābōmbile. Abēne bikwīnogòna ukuti Kyala abalekile abēne.

114 Lōli, kumbukilága, i Lyālabwe likālindekilèmo siku Israeli. Israeli alinkuleka i Lyālabwe, icyēne kyālībwībwe ukufwana ni Lyālabwe ukuya na bēne akabalilo kōsa. Ilyēne lyāli palapala pala, lyābūkīle palapala na bēne ku bumalikisyo bwa nsebwe. “Ilyēne lyābakōngēsya abēne.” Ilyēne likāli panja pa butali bwa kuyobela. Ilyēne likāli pānja pa butali bwakupilika. Pamo, ilyēne likāli panja pa butali bwakukētela.

115 Kangi yope'mma Kristi! Ni Kipanga umwisyugu, Umwene akaya panja pa bupipi bwa kuyobela. Mwe bamo ba umwe mugomokīle-nyuma, kangi mubōmbile kila iki kyo kisóbi, kangi umwe mutāgīle ubusāngalufu bula, kangi a Mīsi gīnu gūmile lōsa. Umwene akaali ali kubupipi bwa kuyobela bwa ugwe. Umwene ikukōngēsya ugwe. Umwene amenye ubwendelo bulibosa ugwe kutendeka kangi kilikyosa ugwe kubomba. Umwene isyukile ukupilika ugwe kunkolela Umwene pa buyo.

116 Kangi ubwendelo bwa kiPentekosti ubukulumba ubu umwisyugu, Kyala ikugulila ugwe ukunkólela Umwene pa buyo. Ugwe ukaya panja pa butali bwa kuyobela nu Mwene. Palema nalinga uswe tubōmbile ubusóbi, kangi tutulilw'inongwa, nukusanusya inyuma syītu pa Mwēne, kangi—kangi tubombile ifindu ifi uswe tutikulondigwa ukubomba, loli pope Umwene ali na uswe. Kristi aayobile Umwene ikuyaga na uswe.

117 Ili Bangeli lyátile, “Amisi gyākongīle abana ba Israeli.” Akabalilo kako abene bali ni kyūmílwa, abene bāmenye a misi gali kifuki.

118 Lilino, ifindu ifi fikulagililígwa ni ndagílo. Bōsa ubwa lubātíko lwa Kyala lukubíkígwa ni ndagílo. Lilino uswe tukwegaga. . . Unko uswe twíme ku miniti.

119 Unko uswe twēge ikīsu. Ikyēne kikusyumbutuka, isala silisyōsa malongo-mabili-na-mana ikyēne kikutēndēka ubusyūmbutuke bumobwēne ubufwāne, fiyo kipelelesye, ukuti. . . Uswe tukabagilámo siku, na syōsa isya sayansi yītu, ukutēndēka i wochi ukukyūnga akabalilo akapelelesye. Kalikōsa kamo nkabalilo, amawochi amanunu fiyo abēne bikutēndekāmo siku, mbubopele bwa kyīnja, gisakukaba pamo kutāga amaminiti mīngi. Loli ikisu kikatoligwamo siku loli iki umwene ali palapala pala pa sekondi. Ikyene kyo kipelelesye fiyo mpaka abasayansi umwisyugu, abamanyandondwa babagīle ukukubula ugwe, mu fyīnja malongo mabili ukufuma lilino pamo ifyīnja malongo mahano ukufuma lilino, itolo katikati ilisuba kangi u mwēsi gwisakukilania yumo nu nnīne. Akabalilo kāko ikyēne kikusyūmbutuka ubusyūngulilo bwāke bwa sala malongo-mabili-na-mana, kangi ikyēne kikusyūmbutuka akabalilo kāke ukusyūngutila injila kuli akabalilo, ikyēne kitikipōndwa na ka nusu. Aleluya! Ikyene kyo nubupelelesye, panongwa yakuti ikyene kikubopa ukufwana nu lulagilo lwa Kyala.

120 Abēne bamenye itolo katikati akabalilo kāko iliyiga lila lisakubūka panja, itolo ku miniti, panongwa yakuti abēne bamenye ko kabalilo nki umwēsi gukugwa. Kangi Kyala ali nafyo filifyōsa fibíkigwe ndubātiko ukwisila mu lulagilo. Kangi akabalilo kāko umwēsi gula gukwīngila pāsi, amayiga gikusōkapo gōpe nu gwēne. Akabalilo kāko umwēsi gukufyūka mmwanya, apa gawkīsa amayiga nu gwēne. Kangi abēne bikumanya katikati, mu kubala, akabalilo kāko u mwēsi gula gwisakusuluka pāsi. Abēne babagīle ukubika ikyēne pa kalendala gwa almanaki kuli fyīnja kunkyēni, nu kukubūla ugwe, ku miniti, akabalilo kāko iliyiga lila lisakwānda ukugwīla pāsi. Naloli, panongwa yakuti iyo yo njila u mwēsi gikusōka pānja, panongwa yakuti ugwēne gubíkígwe ndubātiko lwa lulagilo lwa Kyala.

121 Une nālimile, ilisiku limo, kifuki Nyanja Michigan. Kangi une nābūkīle kula ku Sūmbi Superior, pa nsebwe gwangu ukubuka ku Canada, u mbili unywamu gula ugwa mīsi. Kangi une nālimile pala, kangi une ndinkwinogona, “Ngimba amamailosi mingi bulebule ngimba ikyene kili ukukilania ubugoloke ubukulumba ubu ubwa misi apa?” Kangi poleli bo ngilēnie Mich- . . . pamo, Nyanja Superior, une āngàli ngwīsa mu Michigan, kifuki umbili umfwāne-fwāne gwa mīsi. Kangi kula, ukufuma Nyaja Superior ukubuka Nyanja Michigan, ukufuma Nyanja Michigan ukubūka Nyanja Ontario, kangi itolo. . . kangi Huron, ni nyānja syōsa palikimo. Malinga ama biliyoni ga mabiliyoni ga mabiliyino, kangi amasitakubaligwa amapīpa ga

mīsi amapūpwe galāmbalèle nkati mwa sūmbi yula!

¹²² Kangi kula ku Nevada, kangi mu Arizona, New Mexico, Eastern California, kilāmbalèle maelifu-elifu ga ma ekala ga kyūmu, ikīsu kikupya. Ikyo kyo fiyo kyamboto mpaka, līnga amīsi gala gābagilēmo siku ukufika pa mfu gula, ikikolo iki kyābagile ukuswīla ikīsu, kisita balibōsa abāndu abānjāla, nukuya nifyakupaya ukusopa mu nyānja. Uko ko kotalusya! Amaelifu-elifu ga maekala aga āngāli gikukusya ama tani ga maelifu-elifu ga matani ga mbatata na bakābiki, ni ndima kangi—kangi letesi, kangi abaradishi kangi selāri, amatāngo, kangi kyo fiki ikyākongelelapo. Umfu āngāli gikukusya ikyēne, ikyēne kyo—ikyēne kyo itolo kikunyōnywa ku mīsi.

¹²³ Kangi apa galipo a misi pamwanya *apa*, kangi apa gulipo u mfu pāsī *apa*. Lilino uswe tubagile ukukibona ikyēne, kangi uswe tumenye ikyēne kikubōmbāga ikyēne, panongwa yakuti uswe tubagile ukugela amīsi nukukēta agēne mapūpwe, nukugela umfu nukukēta ugwēne gwamboto. Lilino, kōsa ukunyonywa uswe tukagile ukubōmba, kutisakubīkigwāmo siku palikimo. Lōli, lulipo u lulagilo, kangi ulo lo lulagilo lwa busito. Lilino, līnga uswe twābagile ukubōmba ukufwāna nu busito, uswe twābagile ukōnelèla akayabo kalikōsa ka kīsu kila, ukwēga a mīsi ukufuma ku basūmbi nu kōnelèla ikyēne. Lōli uswe twisakufimbilisigwa ukubōmba ukufwāna nu lulagilo lwa busito. Uswe tukabagile ukunyonywa ikyene panja pala. Uswe tukabagila ukuywega ikyene panja pala. Uswe tukabagila ukukikolela ikyene panja pala. Uswe tukufimbilisigwa ukubomba ukufwana ni ndagilo sya busito, ukukifikisya ikyene pala. Kyala ikubika kilikyosa mu lulagilo.

¹²⁴ Apa, une ninogonaga, une ngamanya kali une mbabulilēmo umwe iki, pamo mma. Une nāli kula mu Kentucky, ngufwīma abalukoti, nu Nkundwe Wood, ukufwana nkyinja iki kikīndilēpo. Kangi uswe...Aba lukoti bāli mu luko lwa kusābūka, kangi polelo uswe twābūkīle ku nyumba ya mwinitu, ukusyagania isya kufwīma. U nnyāmbāla āli na maekala mīngipo ga buyo, kangi pa kibānja iki gyālipo imipiki mīngi. Loli Nkundwe Wood aambulile une, ukuti, “U nnyambala yo nsitakyala. Umwene yo—umwene yo nsitamwitiki.” Polelo umwene alinkuyoba ukuti umwene alimmenye umwene, popāpo umwene. . . pamo ugwise alimmenye umwene, umwēne āngāli ukubūka ukukilania nu kunsūma līnga uswe twābagile ukuya nu bwītikisi ukubūka ukufwīma.

¹²⁵ Uswe tulinkwēndes'iligali ku buyo bwa nnyāmbala uyu. Kangi umwene nu nnyambala uyungi, bosa babili ba abene mu fyinja fya malongo mahano na mabili, abene balitugesye pasi pa mpiki gwa apulo. Kangi Tāta. Wood ābukīle ku nnyāmbāla uyu, kangi umwēne alinkuyoba ku mwēne, “Ngimba une mbagile ukufwīma panini pa buyo bwāko?” Kangi umwene alinkuti,

“Ena,” umwene alinkuti, “fyōsa fili kanunu.” Umwēne alinkuti, “Gwe Wood nki ugwe? Ngimba ugwe ndumiana gwa Jim Wood?”

Umwene alinkuti, “Une yone.”

¹²⁶ Umwene alinkuti, “Ena, ugwaiyolo Jim āli gwanaloli-ndumbula, na fyosa bo ifyo.” Umwēne alinkuti, “Ugwe ubagile ukufwima palipōsa ugwe kulōnda, pa buyo bwāngu. Une ndinago *bwingi-bwakuti* bamia maekala apa, itūla gwimwēne. Suluka mu bala baywēge, kulikōsa ugwe kulōnda. Itolo gwītēndēke gwimwēne ukuya pakāya.”

¹²⁷ Une nālītūgēsye mwigāli, panongwa yakuti une nālinogwīne u ndumbilili nu nsitakyāla bakābagile ukubūka kanunu palikimo, linga umwēne ayaga pakulālusya ubukūndwe bwa nsitakyāla.

¹²⁸ Popāpo polelo ukukīndapo akabalilo, Nkundwe Wood alinkuti, “Ena, lilino, ngimba une mbagile ukuya nu ntimi gwangu na une? Une ngusakikisya ikylene kikuyaga kyosa kinunu kwa umwene ukwisa mula.”

¹²⁹ Kangi unnyambala unkangale uyu alinkusyumbutuka pa ngili yake, kangi umwene alinkuti, “Wood, ngimba ugwe kusanusya ukumbula une ukuti ugwe gwiineme pasi fiyo, mpaka ugwe kufimbilisigwa ukuya nu ndumbilili na ugwe kulikosa kuko ugwe kubuka?”

¹³⁰ Kangi popāpo ikyo, une ndinkwinogona, ukufuma apo, une kinunupo nsokege ukufuma ku ligali. Popāpo une ndinkusokamo mu ligali, kangi nayobile ku nnyambala unkangale yula amaminiti manandi. Kangi umwēne ālindekile une mmanye palapala mbibimbibi ukuti umwēne akāli nakyo ikyākubōmbēla fiyo kuli abalūmbilili, panongwa yakuti umwene inogonaga ukuti abene bayobela ngapo ikindukimo iki abene bakāmenye nakimo ikya ikyēne.

¹³¹ Umwene alinkuti, “Abene balinkukoloma itolo pa kindukimo abene batikumanya nakamo akakufwana. Ena,” umwene alinkuti, “akabalilo kako unnyambala ikuyoba kwa une, une ngulonda umwene ukumanya iki umwene ikuyobapo.” Lilino, ikyo kyo kwīnogona kununu. Ikyo kyo kwīnogōna kununu. Umwene alinkuti, “Lilino, linga u nnyambala ikuyoba kwa une, une ndikulōnda umwēne ukuyoba pa kimo *ikindukimo-ikīngi*, ulusakikisyo ulu umwēne ikumanya nakimo ikya ikyēne. Une ngulonda umwene ukuyoba ikindukimo iki umwene amenye iki umwene ikuyobapo.” Mulimōsa, une ndinkuyīndika ikyo. Une ndikuyīndika ikyo mu nnyāmbāla yula.

¹³² Kangi polelo une ndinkuti, “Ena, ena, uyo yo mwinitu aligwesa ku bwīnogonelo bwāke mwene.”

¹³³ Kangi umwene alinkuti, “Alipo undumbilili yumo uyu ikwisa kuno nkisu iki, ifyinja finandi ifi fikindilepo, uyu āli nu lukomano kula ku Acton.” Kangi umwene alinkuti,

“Undumbilili uyu, ikilo kimo, ukuya nhesya nkisu, alinkuyoba ku u—u nkikulu uyu ālitugesye mu kilundilo, ‘Ugwe uli ni kifūnga mu nyambi yāko. Kangi ugwe gwe Nka. *Gwakuti-na-gwakuti*. Kangi ugwe uli nagwe u kalumbu umbine pa kyamba apa. Ingamu yake yo *Gwakuti-na-gwakuti*. Umwene ikufwa, na kansa munda.’ Kangi alinkuti, ‘Ega ikifūnga iki nukukilambalika ikylene pa kalumbu gwako, nukumbula umwene, “ISI SYO IKUTI U NTWA, umwene atikufwa’mma, loli mumi.””

¹³⁴ Umwene alinkuti, “Unkikulu yulayula uyu āli mwinangu gwa uswe.” Kangi alinkuti, “Uswe tulinkummwega u nkikulu uyu ikifunga iki pamwanya pala, pamo, unnyambala uyu, uu, u mūndu. . .” Ikyakwanda umwene alinkuti, “Unkikulu uyu, unkasi gwangu na une twāli kumwanya kula ulubunju lula kangi twalyēgile, tulinkugulila pa nkikulu uyu. Kangi umwēne āli mbubībi fiyo! Abagānga bālindēkile umwēne, pabutalipo fiyo. Umwēne āli mbubībi fiyo mpaka uswe twāfimbilisigwāga ukunsemesya umwēne mmwēnda, ukumpimba umwēne mmwanya ukumbika umwēne pa mesa ya kitala, ukummwēga umwēne ukungomokesya. Ukunsanusya umwēne mu kyakwīkinga, umwēne āli mbubībi fiyo.” Umwēne alinkuti, “Ikilo kimo, kwīsilya kula, pala pakwīsa unjwēgo ngati abēne bāli nu munduyumo āfwīle.”

¹³⁵ Yula āli Ben ukukilania kula, ni kifūnga kila, ikukyēgēla ikyēne ukukilania kula. Une ngwitika ikyēne kyāli ugwe, bule ikyēne, Ben? [Nkundwe Ben Bryant ikuyoba, “Ameni. Ameni.”—Nsimb] Ikyēne āli Nkundwe Ben ukukilania kula, ikutwāla i kifūnga kila, ’nongwa yakuti umwēne ālintwēla u nkīkūlu yula ukukilania kula.

¹³⁶ Kangi alinkuyoba, “Ulubūnju ulukōnge, umwēne ālyāga ifisyēsye fya maapulo amakalange.” Kangi alinkuti, “Umwēne atikubōmba itolo imbombo yāke mwēne mma, lōli umwēne ikubōmba imbombo ya mpalamani. Umwēne āli kanunu fiyo!” Umwēne alinkuti, “Lilino une kingikingi nswigilēpo. Linga une ngētīlémō siku undumbilili yula, umwēne āmenye iki umwēne ayobelaga ngapo,” alinkuti, “Une—une ngulonda ukuyoba nu mwene.”

¹³⁷ Nkundwe Wood alinkukéta kwa une, kangi une ndinkuketa ku mwene. Twīmīle pala, mbubwapufu, na mafuke kangi bākinyanyasi, twāyaga ku bugonelo mmatengele, kangi—kangi ililopa lya ba lukoti mōsa mwa uswe. Kangi polelo une ndinkuti, “Ena,” une ndinkuti, “ngimba. . . Ugwe kusanusya ukuti ugwe ubagile ukuyoba ku mwinitu uyu kangi umwene ikukubulaga ugwe mumo umwene aabombile kila?”

Umwene alinkuti, “Ena, nkulumba, ikyo kyo iki une ngusanusya.”

Une ndinkuti, “Ena, ikyo kyo—ikyo kyo kindu kinunu.”

138 Une nalyaga limo mwa ma apulo gake. Innini isyaiyolo imbani syājasi yakiyīnja syafikaga mu gēne pala, umwe mumēnye, nkabalilo ka kugwa-māni nkyīnja, mu Ogasiti. Popāpo une nāli nako akaapulo akanini aka, kangi nafumile pakulyābo pa lyēne. Kangi une ndinkuyoba, “Ilyo li apulo ilinunu fiyo.” Une ndinkuti, “Kabalilo katali bule u mpiki gula gwāliko kula?”

139 “O,” umwēne alinkuti, “Une nābyèle u mpiki gula pala, ifyīnja malongo matatu pamo mana ifi fikīndīle, pamo ikindukimo ni kingi.”

140 “Ena, nkulumba.” Une ndinkuti, “Une ngulonda itolo ukukulūlusya ugwe ililālusyo limolyēne.” Une ndinkuti, “Bulebule nkisu kya pasi...Une nguketa aba apulo bala bagwīle ukufuma nkipiki kila, kangi amāni gāke gikugwa pāsi, kangi apa ikyēne kili itolo pakatikati pa Ogasiti.” Kangi une ndinkuyoba, “Uswe tukafuma nukuya nakumo na mapepo amatalalifu, uswe tukafuma nukuya na matalala pamo kalilōsa, kangi pōpe amāni gala gikugwa ukufuma mu mpiki gula. Nongwa ya fiki ikyo?”

Umwene alinkuti, “Ingolya yilekile umpiki.”

“O,” une ndinkuti, “ko kugu ikene yibukile?”

Umwēne alinkuti, “Pāsi mmisisi.”

Kangi une ndinkuti, “Polelo ko kabalilo katali kaki iyene yikwitugasyaga pāsi pala?”

Umwēne alinkuti, “Mpaka nkimela.”

141 Kangi une ndinkuyoba, “Polelo iyēne yisakugomokela pamwanya, nukukutwālila ugwe amāni amapya kuli ikipèpo, amaapulo amapya ukulya.”

Umwene alinkuti, “Uko ko kutalusya. Katikati kutalusya.”

142 Une ndinkuti, “Ena, une ngulōnda ukukulalusya ugwe i kindukimo, nkulumba. Ugwe kuyoba isya binitu aba bakamanya iki abēne bikuyobelapo.” Une ndinkuti, “Ngimba ugwe ubagile ukulīngania kwa une iki Mahala maki gikutēndēka ingolya yila ukusookapo mu mpiki gula? Linga iyēne yālitūgēsye pala ukukīnda nkabalilo ka matalala, umpiki gwābagile ukufwa. Ugwe gwagogaga ikipiki. Imbeyu kya būmi yili mu ngolya yila.” Polelo une ndinkuti, “Iyene yikugogaga ikipiki. Go Mahala maki gikupela ingolya yila ukusookamo mu mpiki gula, ukusulukila mu misisi, nukwitugasya mpaka akabalilo ka kimela, kangi polelo ukugomokela pamwanya kāngi nukutwāla amaapulo agakongelelapo?” Une ndinkuti, “Bika amīsi mu ndobo kangi yīkasya iyēne pa liyēngo, kangi kēta linga, mu Ogasiti, agēne gisakusuluka ukuya pāsi pa liyēngo kangi nukugomokela nkabalilo ka kimela. Muketile?” Une ndinkuyoba, “Lulipo u lulagilo lumo, lulipo u lulagilo lwa kipeligwa. A Mahala gamo gābīkile u lulagilo ulu ndubātiko. Ikyo kyēne mma, lōli a Mahala

gala galagala gikufimbilisigwa ukubōmbela u lulagilo lula, ulu lukubopesya iyēne pāsi ukwingila mu nsisi gwa mpiki, nukwisa ukugomokela.”

Umwene alinkuti, “Une ngalinogwinemo siku isya ikyo.”

143 Une ndinkuti, “Ngimba ugwe ubagile . . . Linga ugwe ubagile ukusyagania a Mahala aga gikupela ingolya yila ukubuka ukufuma mu lusāmba lwa mpiki gula, paasi mmisi nukwiisa ukugomokela, ago go Mahala galagala aga gaalimbulile une kula ikilo kila, ‘Būka, bika ikifunga kila pa nkikulu.”

Umwene alinkuti, “Kangi ugwe yōgwe ndumbilili yula?”

Une ndinkuti, “Ena, nkulumba, uko ko kotalusya.”

144 Ikyinja kya mmayolo une nāli ukukilania (umwene akindle), kangi akabalilo kāko umfwilwe gwāke itūgasyaga pa mbenu, ukupāta amaapulo, ukufuma mu mpiki gulagula. Nkundwe . . . Ikyākwānda abēne bayaga pakubopesya uswe pānja, abēne bakamenye nukuti uswe twāli ba ywāni. Kangi une nābūkile nukumbula umwēne isya ikyēne, ukuti uswe twālītikisigwe ukufuma ku mwēne. Kangi ukubūla isya ikyēne, “Umwēne ātēndike ukwīlāta kōsa kwa Kristi bo akāli umwēne ukufwa.”

145 Umwe mukētile, iki kukubōmba umpiki gula, go Mahala maki gikubopesya kila pāsi? Ulwēne lo lulagilo. Ulwēne lo lulagilo ulu Kyala abīkile ndubātiko. Kangi ululagilo lula lo lulagilo lwa Kyala ulu lwisakupakikisyaga isya kyakupilikila. Amen.

146 Umwe mumenye, une ndikupasya kali ugwe kukuutaga bulebule panja, nukuyoba—yoba lilino, “Ukwene kutisakuyaga, ilisuba litisakumulika kangi mma palumu ulu.” Ilyene lisakumulikaga, mulimosa. Kalinga ugwe kuyobaga, “Une—une—ndikuyaga pakuleka akabalilo ka kilo ukwisa.” Ikyēne kisakwisaga, mulimosa. Panongwa yakuti i kindu iki iki uswe tukwitugasyamo, kikukōlelīgwa i kīsu, kikulagililīgwa nu lulagilo lwa Kyala.

147 Lilino, bakundwe na bakalumbu, une ngulonda ukubalalusya umwe i kindukimo. Polelo, linga uswe tupāpigwe kangi nu Mbepo gwa Kyala . . . Kyala atikuya nato utuyabo utunini utōnywa kangi ifiyabo ifinywāmu ifyamaka, Umwēne yo palikimo lōsa Kyala! Kangi linga ugwe gwāli nagwe gwākufwāna Kyala mwa ugwe, mpaka Ikyēne kyāli itolo kifuki u nsyūngūlu, ago go maka gākufwāna ukupela ikīsu ikippya. Ago go maka gākufwāna ukutēndēka u mwēsi umpya kangi ikipāngānio ikippya. Ikyēne yo Kyala, kangi ikyēne kyo kyamaka! Kangi lululu lilino umwitiki aligwesa muno ali nu Bumi bwa Syepwa, uyu yo, Mbepo gwa Kyala mwa umwe; a Maka gākufwāna aga gisakufyūsyā abafwe, aga gisakubūmbulusya ababine, aga gisakubīka njila nkayīlo. Loli ugwe, ikyene kyo kikulagililīgwa nu lulagilo, u Mbepo yula uyu ali mwa umwe. Umwe mwe banabalumiana na banabalindwana ba Kyala. U

Mbepo yulayula uyu ugwe ulinagwe mwa ugwe, isakufyūsyā gwīmwenē mmwanya pa lisiku lya busyūke.

¹⁴⁸ Yeso, akabalilo kako Umwene aali pa kisu kya pasi, akabalilo kako Umwene afwege, umoyo Gwake gulinkusulukila ku gehena, “Kangi alunkulūmbilīla ku mbepo isi syāli mminyololo, imyoyo mminyololo, igi gikāpindwiike mbukubilwe-butali bwa masiku ga Noa.” Umbili Gwāke gwābūkīle mu lipūmba. Lōli bo Umwēne akāli ukufwa, Umwēne ālitikisye u Mbepo Gwāke mmaboko ga Kyala. Mbepo Gwake alinkubuka kwa Kyala, umoyo Gwake gwabukile ku gehena, kangi umbili Gwake gwabukaga ku lipumba. Kangi Yeso āpingikigwe panja ukufuma ku busyuke mpaka i Lisimbo lyābagīle ukufwanikisigwaga. Umwēne akābagīle ukugomokela, panongwa yakuti Umwēne āfimbilisigwāga ukusyāla mu lipūmba ku masiku matatu ni kilo. Lōli akabalilo kākō i Lisimbo lyāli lyōsa lifwanikisigwe, ikipīngo iki kyāsōsigwēpo; U Mbepo Gwake alinkusulukila ku moyo Gwake, umoyo Gwake ku mbili Gwake, kangi Umwene aasyukile kangi.

¹⁴⁹ Kangi akabalilo kako uswe tukufwa, imyoyo gyitu gikubukaga pāsī pa kigemo kya Kyala; kūko une nāli nu lusako ukukēta, utulubūnju utunāndi utu tukīndile, bo umwe mumanyīle, mu mboniboni, kūko i Bāngēli likuyobelapo, “Imbepo syītu sikubūka kwa Kyala Yūyo abāpēle ikyēne, kangi imibili gyītu gisa kugomokela ku mfu gwa kīsu.” Lōli ilisiku limo, akabalilo kākō i Lisimbo likusisimikisigwa, imbepo syītu sisakwābuligwāga ukufuma kwa Kyala, sisakupīmba mmwanya u mōyo, kangi u moyo gwa mbili. Kangi a Maka aga gikutusumunya uswe, gali munomuno mwa uswe lilino! Uswe tuli lilino mmabuyo Gammwanya. Uswe tuli lilino mu Maka ga busyuke.

¹⁵⁰ Linga lukālīpo ululagīlo ku ikyo, abanabalumiana na banabalindwana ba Kyala āngāli bikupela abēne i kīsu panja apa nukubūka ukwitūgala u būmi bwa pagwīmwenē pa ikyēne. Ugwe uli na Maka mwa ugwe ukubomba ikyene. Linga ugwe uli nu nsyūngūlu gwa Maka ga Kyala mwa ugwe, ugwe uli na Maka ukubomba ikyene. Kyala yo gwamakagosa. Muketile ifi une ngusanusya? A Maka aga gali mwa ugwe gikutendekāga, ugwe ubagīle ukuyoba i kīsu mu kuyapo nukubūka ukwitugasya pa kyēne. Haleluya! Mwaketa lelo umwe.

¹⁵¹ Ikyo kyo iki a Maka gali mu Kipanga lilino, loli ikyene kikulagililigwa nu lulagilo. Kangi ululagilo lula lukaya “ukukyunga ikipambo kya ngomelesyo.” Ulwene lo lulagilo lwa lwitiko. Yeso aatile, “Fyosa ifindu fibagīle ku bēne bābo bikwitika.” Kangi linga ugwe ubagīle ukwitika ikyene, kilikyosa iki Kyala isakukulongosyaga u moyo gwako ukwitika, ikyo kyo kyako. Ubuyo bosa uluyayo lwa kilundi kyako kibagīle ukwitugasyapo, nu lwitiko, Kyala ikukupa ubwene kwa ugwe. Ameni! Ikyēne kyo kyāko, ugwe ega ikyēne, linga ugwe ubagīle

ukwāga ifūngulo ku lulagilo ulu lwa lwītiko ikyo kikwīgula ulwēne kwa ugwe. Umwe muketile iki une ngusanusya? A Maka gala gikulagililigwa ni... Linga ugwe gwe mwanundumiana gwa Kyala, ugwe gwe mwanundindwana gwa Kyala, ikyo kitikukulekamo ugwe siku. Ikyene kili na ugwe akabalilo kosa. Loli, ulwitiko lwako lukusokako kubutali ni Kyene, loli Ikyēne kikāli kili pala. Aleluya!

¹⁵² Akabalilo kako ugwe upokigwe, Kyala ikukupa ugwe ulwitiko ukufyuka ukufuma ku ndipa ya kisu. U lwītiko lwāko lukuponjola i findu fya kisu. Ngimba u lwītiko lo fiki? Ulwitiko lwako mu mbombo iyi Kyala abombile mwa ugwe, ukukupela ugwe ukuya mwanundumyana gwa Kyala. Ugwe kuleka ukusyōba kwāko, ugwe kuleka ukuhiya kwāko, ugwe kuleka ukunwabwālwa kwāko, panongwa yakuti u lwītiko lwāko lukufyūkila ugwe pamwanya pa ikyēne. Ameni. Linga ugwe utikubomba ikyene, ugwe ukaya nu lwitiko lulilosa. “Kangi nu lwitiko ugwe upokigwe, kangi ikyo ukwisila mu lipyana.”

¹⁵³ Na bubwīngi mūmo u lwītiko lwāko lwisakwābuliligwa, ubo bo bwīngi bwa Maka ugwe ubagile ukuya nago, panongwa yakuti mwa umwe mwitūgēsye a Maka ukutēndēka Kumwanya na pāsi. Kyala ikwitugasya mwa umwe, kangi umwe mwe banabalumiana na banabalindwana ba Kyala. Ameni! Mwaketa lelo umwe. Loli, ulwene lo lwitiko lwako. Yeso aayobila, “Ukufwana nu lwitiko lwako, kiyege ikyēne kwa ugwe. Linga ugwe ubagile ukwitika, fyosa ifindu fibagile. Naloliloli, Une nguyoba kwa umwe, linga umwe mukuyoba ku kyamba iki, ‘Samisigwaga,’ kangi komma ukwilamwa, loli itika ukuti iki ugwe uyobile!”

¹⁵⁴ Polelo lo luko luki ulwa bandu ulu uswe tukufimbilisigwa ukuya, ukuya nu lwitiko mwa unkulumba ugwakutabūla Kristi yu mūmi mwa uswe, Ibwe ilitikigwe ili litikulekamo siku i Kīpanga? “Une ndi na umwe bwila, pope nakubumalikisyo bwa kisu,” u Buyepo-bwila bwa bōnelelo ubukulumba ubwa bupoki na Maka aga gālyōnike panja ukufuma ku Kalvari ukwingila mu Kipanga, u Buyepo-bwila bwa Kyala gwabūmi, ukusāta ukukulumba, i Lyālābwe ilitikigwe ili likubūka na uswe mu njila yītu.

¹⁵⁵ Israeli āyōngisye u lwitiko lwake. Abene basokilepo pa njila. Abene balinkwanda ukunyonywa kuli indeko sya minyōfu. Linga abene basyele nu lwitiko, nukwitika ukuti Kyala ayaga pakubega abene ku kisu, pala āngali bakayapo nakamo akakubapīnga abēne. Abēne bātālile bālīgwire abasūmbi, abēne bātikile ifiswīgu pa balugu bābo, abēne bakomelile abalugu bābo kunyuma ku bēne, kangi bālyēndile ukukilania nkisu, kangi pōpe balinkutoligwa ukuya nu lwitiko ukubuka ku lufingo.

156 Yoshua na Kalebu bāli nu lwítíko lula! Abēne balinkuti, “Uswē tuli bakinda babagisanie ukuponjola kalikosa aka kakwisaga pankyeni pa uswe.”

157 Ulo lo lutamio ni kipanga. Uswē tubagile ukuponjola imbungo yiliyosa. Uswē tuli na Maka mwa uswe. Uswē twe bānabalumiána na banabalindwána ba Kyala, nakimo kibagile ukwīma pankyēni pa uswe. Ikindu kyene, Umwene ikulonda ukummwaga yumo uyu isakwitikaga ikyene, uyu isakwitikaga iki Kyala atalile abombile kwa ugwe. Komma uswe *twisa* kuya; uswe tuli lilino! Kangi ukwābūmi-bwīla u Kuyapo kwa Mbepo kuli kifuki na uswe. Ameni! Mwaketa lelo umwe.

158 Ikyo kyo iki une ngusanusya akabalilo kāko une nāyobīle isya kimanyisyo ulubunju ulu, *Amayepo-Bwīla A Misi Gākufūma Mu Lyālabwe*. A mayepo-bwīla a Misi ukufuma ku Lyālabwe gali apa lilino, gala a Misi amayepo-bwīla ukufuma mu Lyālabwe ilitikigwe ku Kalivari. Akabalilo kāko u Mbepo Mwikemo yula āsōkīle ukufuma pa Mwēne pa Kalvari, uyu āgomokāga pa Kipanga pa Lisiku lya Pentekosti, u Mbepo Mwikemo yulayula ali apa ulubunju ulu. Kangi Ikyene kitupele uswe u lufingo!

159 Iyo yo nongwa, ukwēnda pankyēni pa bāndu ababine, akabalilo kāko Umwēne ālindūmīle une kula, une ngwitika ikyēne; Kyala āyobīle lūlo! Umo mo mūmo imboniboni sikubonekela; Kyala āfingile ikyene! Kyala akabagila ukusyoba.

160 Kwitika ikyene! Ugwe kufimbilisigwa ukwitika ikyene. Kibagile ukuyapo i Kindukimo pala, igula ikyo ikyakupōnjolela, igula ikīndu kila ukukwītikisya ugwe nkati pa kyēne. Iki uswe tukulondigwa umwisyugu kukaya ko ukwīputila a Maka amakindepō. Umwe muli na Maka agakufwana ukutendeka ikisu ikipyā. Iki ugwe kulondigwa lo lwitiko ukubombela a Maka gala. Iki ugwe kulondigwa kyo ukulagila ubumi bula, kangi ukuya nu bumi bwabwakyala bo ulu, ukuti akabalilo kakō ugwe kunsuma Kyala kalikosa, ugwe umenye! Uswē tuli nu lusubilo mwa Kyala, ulwa ikyo. Uswē tumenye, linga uswe tukukyunga i Ngomelesyo Syake, Umwene atisakufisaga ikindu nakimo ikinunu ukufuma kwa uswe, linga uswe tukwenda nu Mwene. Kyala ikwenda na uswe. O, mwe!

161 Abēne bāli nakyo lōli ikindu kimokyēne ikyākubōmba. Abēne bāli nakyo lōli ikindu kimokyēne ikyākubōmba, ikyo kyo, ukusyāla kulakula ukutalula pa njila. Komma ukubēla panja ukukilania *apa*, kangi ukubunabuna kubwa *kula*; lōli itūgala pa njila! I Kipānga kili nakyo lōli ikīndu kimokyēne ukubōmba, syāla pa njila! Abene bāli ni Mbanda ya Moto, iyi abene bāli nayo, ukwimilisya bene mu njila ukwisila mu kukōngésya i Mbanda ya Moto yila. Ikyo kyo iki kyābalōngosyāga abene. Ikindu kyabo abene bābagile ukukéta, āli yo Mbanda ya Moto

yila. Abene bakibwene Ikyene kikubombela ukwisila mwa Mōse, kang'i abene bāmenye ukuti umwene āli ndongosi.

¹⁶² Umwisyugu uswe tuli ni Lisyu. Uswe tukukōnga i Lisyu. Kang'i uswe tukukéta i Lisyu likubomba mwa bitiki, kang'i uswe tumenye ikyene kyo lūlo, polelo. Kyala ikubōmbēla na uswe, ikusisimikisya i Lisyu ni fimanyilo fikukonga! Uswe tukwitugasya ni Lisyu. I Lisyu likutwāla ifyakukōnga.

¹⁶³ Abene basyele na Mose. Panongwa yakuti, i Mbanda ya Moto, Mōse alinkukongesya Ikyo. Kang'i abene balinkukongesya. Akabalilo kākō bikwānda ukusanuka ukulwāna na Mōse, nukwilūmbusya ukulwana na Kyala kang'i ukulwāna na Mōse, abēne balinkwānda ukubēla pānja ku lubafu lumo kang'i ulūngi. Indamyo sikwisa mula. Naloli.

¹⁶⁴ Uswe tukwitugasya ni Lisyu, kang'i i Lisyu likutwāla ifimanyilo. Yeso aatile, "Ifika ifi fisakukongaga abene aba bikwitika i Lisyu." Muketile, ikyene kikwimila ni . . . Ugwe syala ni Lisyu, i Lisyu likutwala ifimanyilo. Loli, Mōse, ngimba umwene ābombīle fiki?

¹⁶⁵ Abēne balinkubēla pānja, kang'i ngimba abēne bābōmbīle fiki? Babēlāga pānja pa injila, kang'i abēne batāgile ubutwāle bwa amisi gābo.

¹⁶⁶ Une ngwinogona ikyo kyo iki ikipanga kibombile umwisyugu. Ikyene kibēlile panja pa njila ya Lisimbo. Abene basōkilepo panja pa fimanyisyo. Abene basōkilepo panja pa findu ifi abene bakābagile ukubomba. Abene bāsīme i findu. Abēne bēgelelāga ifindu bo Kimanyisyo kya Batumigwa. Ngimba ko kagu ugwe kukyāga ikyo mu i Bāngēli? Abēne bīfwīkile abakatekisimo aba abēne bikubala. Abēne bīfwīkile ifipānga-fipāgūke mbuyo bwa bwēndelemo. Abēne bīfwīkile ukuponania amaboko mbuyo bwa bwēndelemo bwakupāpīgwa-kang'i. Abēne bīfwīkile ukunyāfila mbuyo bwa lōsyo lwa mmisi. Abene bīfwīkile uluko lwa bubibi, "Tata, Mwanundumiana, na Mbepo Mwikemo," akabalilo kako kikayapo ni kindu nakimo bo ikyo mwi Bangeli. Ilibangeli lyāyobile, "Mu Ngamu ya Yeso Kristi!" Kilipo ikindu kimokyene ikyakubomba linga ugwe kulonda a Misi galagala gala, ukugomokela ku njila kang'i. Gomokela ku . . . Umwēne akakuleka ugwe; Umwēne yo akāli ali apa. Umwe mukwēga ifimanyisyo mbuyo bwa Kristi. Umwe mukubēla panja pa ngalalisi.

¹⁶⁷ Yumo alinkuti, "Ena, une ndi gwa Methodisti."

Uyungi ikuyoba, "Une ndi gwa Baptisti."

Ikyo kikubonesya ugwe ukaya Nkristi, polelo. Uswe tuli ba Kristi! Uswe tuli ku Mwene.

Ugwe kuyoba, "Ena, linga, une, m'Baptisti?"

Linga ikyo kyo kyosa ugwe uli, polelo ugwe ukaya nakimo mwa Kristi, ugwe uli gwa Baptisti.

Ugwe kuyoba, “Ena, une ndi gwa Pentekosti.”

Linga ugwe uli itolo gwa Pentekosti ni kipanga-kipāgūke, ikyo kyo kyosa ugwe uli.

¹⁶⁸ Lōli, linga ugwe uli nabo ubwēdelemo bwa kipentekosti! Kangi i Lisyu lyapentekosti likutwalaga panja ifyakubonekela fyapentekosti! Kōngésya ikindu kilakila iki abafūndígwa bala bābōmbīle, syala pammwanya kula mpaka ugwe gwisusígwe na Mbepo Mwikemo.

¹⁶⁹ Kangi polelo linga ikyo ugwe kwēga ukukanikana ni Lisyu, u mbepo yula mwa ugwe ikubuka kubutali na iki i Lisyu likuyoba, polelo ikylene akaya yo Mbepo Mwikemo. Umwene yo mōhési ikwegelela u Mbepo Mwikemo. Umwe muketile apa uswe tukufyaga pa kyene? O, twe bamo ba uswe twāyobile mu ndimi, uswe twāli mapepo ga kuywega ni findu bo ifyo, nukukāna fyosa ifindu ifingi ifi. Uswe twākubilwe kilikyosa iki kikaali mu Lisimbo ukwisa nkipanga. Kuko uswe tukufimbilisigwa umwisyugu? Uswe tugomokile ku lulangalanga ulungi, ifipānganio ifyūmu lōsa. Uswe tupāngénie, kangi tutāgīle a Misi gitu. Ikyo kyo katikati iki Pentekosti ābombīle. Akabalilo kāko ikyēne kilinkwānda ukupāngānia, ikyēne kilinkwānda ukubongotola lōsa ubulilanisi, nukuyoba, “Ena, lilino uswe tutisakulilanila, linga u miana uyu ikwitika *kila*.”

¹⁷⁰ Kindililaga, itugasyaga nu mwene mpaka umwene ikwisa ku Lisyu lya Bwanaloli, ubumanyi bwa Bwanaloli. Kilikyosa ikylene kili, unko ikylene kibūke, mulimosa. Itolo kindililāga, ukuya bo bakundwe.

¹⁷¹ Lōli, o, uswe twafimbilisígwe ukupāngānia, nukuyoba, “Ena, panongwa yakuti ugwe ukaya gwa Bumobwene, panongwa yakuti ugwe ukaya gwa Bubili, pamo Butatu, pamo ngati *iki*, uswe tutisakuya nu bulilanisi na ugwe.” Polelo akabalilo kako uswe tukubomba ikyo, ngimba uswe tukubomba fiki? Uswe tukwitwala twibene ukugomokela ku lulangalanga kangi. Uko ko kotalusya!

¹⁷² Lōli, kumbukilāga, akabalilo kāko Israeli alinkwendendeka ukufuma ku njila, injila ku kisu ikifīngígwe, i Lyālābwe likābalekilémo abēne; Ilyēne lyāsyēle palapala pala, mo mūmo gābōmbīle a mīsi. Momumo u Mbepo Mwikemo, ikwitugasyaga palapala pala. Uswe tutikufimbilisígwa ukwēmbéla ukugomokela.

¹⁷³ Lilino, apa Kyala ikutumanyisya uswe ikindu ikikulumba. Kyala ikutumanyisya uswe apa akamanyisyo. Kristi ātikīgwe akabalilo kamo, ukutupa uswe ikyakubonekela kya pentekosti, akabalilo kamo, kuli fyosa. Lilino, akabalilo kako i Lyālabwe lila likomigwe, Ilyene likābagile ukutikigwa kangi mma. Ilyene lyākomigwe itolo kamokēne.

174 Mōse ātēndike ingilanio ukulitika Ilyēne akābubili, ukunāngiswa ubōnywa bwa lwītiko lwāke mu Buhōmbelo. Loli akabalilo kako Kristi ātikigwe akabalilo kamo, uswe tumenye Umwene atisakufimbilisigwa ukutikigwamo kangi. Ena, ngimba Mose abombaga fiki? Mōse ābīkāga ikindukimo ikipya, ukugela ukutendeka ikindu ikipya.

175 Kangi iyo yo njila iyi abapūti bītu babōmbīle umwisyugu. Abene bagelile ukutendeka i kindukimo ikipya. “Uswe twisakwītēndēka twībēne i Imbūnganie sya Kyala. Uswe twisakwītēndēkāga twībēne i Kipānga Kyapentekosti kya Kyala. Uswe twisakwītēndēka twībēne u Lukomano Lwabōsa. Uswe twisakwītēndēka twībēne *iki, kila*, pamo *ikīngi*.” Ikyo kikaya iki Kyala ābombile. Yila yikāli fundo Yake mma.

176 Kristi ātikigwe kamokene. Uko ko kwendelamo kwapabwāndilo. Iyo yo njila yapabwandilo. Pa Lisiku Iya Pentekosti, Peteri āyobīle, “Pinduka, aligwesa gwa umwe, kangi yaga bōsīgwe nu Ngamu ya Yeso Kristi.”

177 “Uswe tukunyāfila mu ngamu ya ‘Tāta, Mwanundumiana, Mbepo Mwikemo,’ ukupa uluko lōsa ulwa fimanyisyo na filifyōsa ifingī ukufwana ni Kyēne.” Akabalilo kāko uswe tukusōkāpo pa Lisyu, kisita kuswīga uswe tukabagila ukufika nakumo. Muketile?

178 Kyala ikutumanyisya uswe akamanyisyo. Mōse akabagisenie ukuyoba, “Lilino uswe tukwandaga ikindukimo ikipya apa lilino, kangi uswe twisakupāngānia kangi uswe twisakutēndēka i kipanga kya Katolika.” Ikyo kyo kīndu kyākwānda abēne bābōmbīle. Umma, polelo bo kakindilepo akabalilo, “Ena, uswe tukwandaga ikindukimo ikipya ukufuma ku ikyo, uswe tukutendekaga ikya Luteri.” Polelo ikwisa u Anglican, kangi polelo u Baptisti, kangi fiki ikingi, kangi ikiCampbell, kangi Kipanga kya Kristi, kangi ndwananakristi, ni findu fyosa ifingī. Muketile, abēne bosa balinkwānda ukubūka, yumo ukukōnga uyungi yula, yumo ukukōnga uyūngi yula, ukutēndēka ifipānga-fipāgūke ni fipānganio. Ikyo kikāli ikylene mma. Muketile pala iki abene bikubomba? Abēne bikutika i Lyālābwe kangī, ukwānda ikindukimo ikipya. Uswe tutikulōndīgwa ikimanyisyo ikipya.

179 Unnyambala aligwesa mu i Bāngèli alyosigwe mu Ngamu ya Yeso Kristi. Unnyambala aligwesa mu i Bangeli uyu alinayo Mbepo Mwikemo, isile injila ya Kyala, katikati injila iyi Kyala ābombile ikylene ukuya. Abēne bābōmbīle ikindu kilakila. Abēne bāli nu bwendelo bulabula. Ifimanyilo filafila fikukōngēsya abēne. Imbombo yilayila yikukōngēsya abēne. Fiki? Abēne bitūgasyāga ni Lyālābwe. Abēne bali na Mīsi galagala.

180 Kangi, umwisyugu, inongwa iyi uswe tulinafyo ifimanyisyo ni fipanga-fipāgūke, yo nongwa yakuti uswe tukwānda

ikindukimo ikipya. Uswe tutikulondigwa nakimo ikipya'mma. Gomokela kunyuma!

¹⁸¹ Mōse akālōndigwāga ukutika i Lyālābwe kangi, ukwānda ikindukimo ikipya. Umwene abagile ukuyoba ku bene, isya Lyalabwe lyapakwanda. O, une ngusubila umwe mukupilikisya ikyo! Mōse abagile ukuyoba isya Lyālābwe lyapakwanda, ilitikigwe; komma ukugela ukutika Ilyēne kangi, komma ukugela ukwanda ikindu ikipya, lōli ukuyoba ku Kindu ikyatyolo!

¹⁸² Kyala, ndula une! Linga une ngufwa nsuilwa, mu kigemo, une nguyobaga isya Lyalabwe lyapakwanda! Une nguyobaga isya bwendelele bwapabwandilo. Une nguyobaga isya Masimbo agapabwandilo aga gābapele abene u losyo lwa Mbepo Mwikemo, “Pinduka, aligwesa gwa umwe, kangi yaga mōsigwe mu Ngamu ya Yeso Kristi ku buswe bwa mbibi syinu, kangi ugwe kwisa kwambililaga ikyabupi kya Mbepo Mwikemo.” U Kuyapo-bwīla kwa Misi gākwendelela ukufuma ku Lyālābwe kukāli na uswe. Ikyēne kisakutwāla panja ikindu kilakila. Ikyēne kisakutwāla panja imboniboni. Ikyēne kisakutwāla panja imbūmbulusyo. Ikyene kisakutwala panja amabusololi. Ikyene kisakutwalaga panja ikindu kilikyosa iki abene bābombile.

¹⁸³ Akabalilo kako Israeli āgolwike kangi mula mu Masimbo kangi, kangi ukugomokela pa nsebwe, abene babukile pa kisu ikifingigwe. Loli kyābēgile abēne i fyinja malongo mana.

¹⁸⁴ Pentekosti āli kifuki fyinja malongo mana pamo malongo mahano, ukubēla ukusyūngutīla mmatengele. Gomokelaga ku Lyalabwe! Ikyene kili mmaso. Apa ikyene kili, kisimbigwe apa pa Lisyu. U Mbepo Mwikemo ali apa ikubomba ikindu kilakila iki Umwene akabalilo kosa ābombile, polelo u Kuyapo-bwīla kwa Misi kuli apa. Itolo gomokela ku Kyēne, gomokela ku kyapabutasi, ikyapabwāndilo. Ngimba kyali bulebule mbwāndilo?

¹⁸⁵ “Ena, abene baponiaga ifiboko nu ndumbilili”? Nakimo i kindu kya luko ulō. “Abene alyosigwe mu ngamu ya ‘Tata, Mwanundumiana, u Mbepo Mwikemo’”? Kikayako ni kindu bo ikyo. Akayako u mūndu na yumoywēne mwi Bāngéli, kulikōsa, pamo panja, ifyinja bamia batatu panja pa i Bāngéli, alyosigwemo siku mu ngamu ya “Tata, Mwanundumiana, Mbepo Mwikemo.” Ikyo kyo kimanyisyo kya kiKatolika, komma ikimanyisyo kya li Bangeli. Muketile?

¹⁸⁶ Abene bali na Mbepo Mwikemo. Ifika ifi fikukonga abene bābo bālitike. Ikyene kisakubombaga ikyene kangi umwisyugu. I Lyālābwe lila lyo itolo lyābūmi-bwīla bo mūmo Ilyēne lyālimo siku, lila i Lyālābwe ilitikigwe!

¹⁸⁷ Unko uswe tulingayobaga, “Mulimosa, lilino ugwe isaga kuno nukwīngila ikyītu i kipānga Kyapentekosti, ingila nkati

mabuyo Gapentekosti.” “Umma, ugwe isa kula nukwingila mu Baptisti, pamo u Methodisti, pamo mPresbeteri, pamo kiKatolika.” Ngimba ikyo kyo fiki? Uko ko kutika i Lyālabwe mōsa kangī, ukugela ukwānda ikindukimo ikipya.

¹⁸⁸ Ukubabūla abēne, “Pinduka, kangī yaga bōsīgwe mu Ngamu ya Yeso Kristi,” ku busyūle bwa mbībi syābo, “kangī ifimanyilo ifi fisakukongaga abene aba bikwitika.” Lilino umwe mugomokīle pa nsebwe, ukugomokela ku Mīsi galagala. Galagala a Mīsi gisakupa bulabula ubupūpwano. Agēne gisakupa bulabula ubukomigwe ku mbili. Ikyēne kisakupa a maka galagala agākusukila. Ikyēne kisakupa a maka galagala agākubūmbulusya. Ikyene kisakubombaga ikindu kilakila Ikyene kyābombile akabalilo kala, linga uswe itolo tukugomokelaga ku Mbepo yulayula.

¹⁸⁹ Bumi mu mpesa gwa mafilu gwisakutwālaga pānja amāfilu. Linga ikyēne kyābōmbile nkyīnja iki kikīndīle, ikyēne kisakutwāla ikīndu kilakila ikyīnja iki. Ulo la lulagilo lwa Kyala. U lulagilo lwa Kyala lo lwakuti, linga ugu go mpesa gwa māfilu, guleka ugwēne pagwēne, ugwēne gwisakutwāla amāfilu. Ugwe ubagile ukutogesya ikyene ni kindukimo ikingi, lōli polelo kileka ikyēne pakyēne kangī ikyēne kisakwīsa palapala ukugomokela ku māfilu galagala kāngi.

¹⁹⁰ Popāpo uswe tutogesēnie nkati ikipānga ni kiPentekosti, ni kiBaptisti, ni kiMethodisti, ni kiPrebeteri, ni—ni kiAnglican, kangī u luko lulilosa ulungi lwa kimanyisyo. Nongwa ya fiki ugwe utikukileka ikyene pakyene? Gomokelaga ku Mpesa, ugwēne gwisakugomokelāga ku Maka galagala. Ameni! Ameni! Une nkiganile ikyo.

¹⁹¹ “Anda ikindukimo ikipya.” Ikindu kilakila uswe tubōmbīle. Komma ukugela ukunāngisya ubulagili bwītu. “Dokotala *Gwakuti-na-gwakuti* yo mwenelwalo gwa kikulumba *Kyakuti-na-kyakuti* kipānga ikya *kyakuti-na-kyakuti-na-kyakuti*.” Ikyo kikāli ikyo mma.

¹⁹² Ikyo kyo iki Mōse āyobile, “Une ngubanāngisyaāga abēne iki une mbagile ukubōmba. Une ngwisakukitwāla ikyēne, mulimosa!” Umwēne alinkulikoma Ilyēne, ikyēne kikālisīle mma. Umwēne ikuywēga kangī, “Nāngisya iki une mbagile ukubōmba!” Kyala ālimfūdile umwēne panongwa ya ikyo.

¹⁹³ Ngimba umwe mutikwinogona, linga umwe “itolo mukukolelela ku kipanga-kipāgūke kimo.” Kyala isakukufūnda ugwe panongwa ya ikyo. Uko ko katikati kotalusya. Ugwe kufimbilisigwa ukugomokela ku kyapabwāndīlo kila. Gomokela kunyuma.

¹⁹⁴ Yoba itolo ku bandu. (Komma ukubabula abene, “Ugwe isa ingila ikipanga kyitu. Ugwe isaga yoba kimanyisyo kyitu.”) “Ugwe gomokela nu kupinduka, kangī yaga mōsīgwe mu Ngamu ya Yeso Kristi, ku busyūle bwa mbībi syāko; kangī ugwe kwisa

kwambililaga ikyabupi kya Mbepo Mwikemo, linga indumbula yako ndalusye. Kangi ifimanyilo ifi fisakukongaga abitiki. Ikibugutila kya bitiki, ifimanyilo ifi fisakubukaga na bene.” Nongwa ya fiki? I Lyālábwe, ilitikigwe i Lyālábwe na Mísi Gáke ga Būmi yo ikwisa palapala pánja, kikipápa ikindu kilakila iki Umwēne ābōmbíle kunyuma kula. Ikyēne itolo kikabagíla ukutoligwa ikyēne. O, ena.

¹⁹⁵ Uswe tukulonda ukubonesya, nukuyoba, “Uswe twe baMethodisti, na baBaptisti.”

¹⁹⁶ Yoba itolo ku Lyālabwe, Umwēne yo Kuyapo-bwila. Komma ukugela ukwingisya Ilyēne. Une nāli nakyō “ubwilūngisye” pāsi apa. Komma ukugela ukwīngila Ikyēne. Ugwe ukabagila ukwīngila Iki, ikyo kyo kindu kimokyēne kyanaloliloli. Ugwe ubagile ukwingila aba Methodisti, ugwe ubagile ukwingila aba Baptisti, ugwe ubagile ukwingila aba Pentekosti, ugwe ubagile ukwingila abaAnglican, loli ugwe ukabagila ukwingila Iki. Umma. Ugwe kufimbilisigwa ukuya mwisusigwe na Iki. Komma ukwilungisya ku Ikyene; yaga itolo mwisusigwe ni Kyene. Ikyo kyo kyosa. Ikyene kīsúsígwe na fiki? Gwīsúsígwe na Maka, kīsúsígwe na Mbepo, gwīsúsígwe nu Būmi, gwīsúsígwe nu buhobofu, lutengano, ukusukulika-kabalilokatali, ubōlōlo, ubununu, Maka ga Mbepo Mwikemo mbumi bwako, kabuno u Kuyapo kwa bwilanabwila kuli pala. Kumbukilaga.

Une ngufimbilisigwaga ukwīgala ’nongwa yakuti ukwēne kwāndíle ukwíla.

¹⁹⁷ Lōli, kumbukilaga, i Lyālábwe lila likābalekilēmo siku abēne. Ilyēne nalōli likabalekilēmo siku abēne. Kangi Kristi atisakutulekamo uswe siku; Kristi aatile, “Une nguyaga na umwe bwila, pope nakubumalikisyo bwa kisu.” Ngimba ikyo kitalusye? Kangi i Lyālábwe lila lyāsýèle na bēne injila yōsa ukufuma ku Horebu mpaka Nebo. Ilyēne lyābōmbíle. Pāsi ku Yorodani, Ilyēne lyākāli lyāli pala. O Kyala, une ngulōnda ukulibona Ilyēne ku Yorodani!

¹⁹⁸ Mōse, akabalilo kāko umwēne āli ku Yorodani, i Lyālabwe lyāli nu mwēne injila yōsa ukukīndilíla. Kangi umwene imaga pala, ikuketa ku—ku kibugutila kya bandu aba bagomokile kunyuma nukusookapo ukufuma kwa Kyala. Indumbula Yāke yālisýúkile kuli abēne. Kangi umwēne alinkukēta ukukilania Yorodani. Pala umwēne āli ku Yorodani. Yorodani, gwamwambepo, une nguyobapo. Kangi pala umwēne ālimíle pala, ubufwe bwasegelelaga nkiboko kyāke. Lōli umwēne alinkukēta, ālāmbaléle pala pa lubafu lwāke kangi pala lyālāmbalele i Lyālábwe. Umwēne alinkufyūkila itolo pamwanya pa Lyālábwe, kangi a Bāndúmi balinkwisa, balinkumpimba umwēne ukusōkápo.

¹⁹⁹ “Une ndisakukulekamo ugwe pamo ukukutaga ugwe.” Kali bo bukafu buki akabalilo kakuya, kali bo bukāngàle

bulebule uswe tukuya, lo luko luki ulwa bufwe uswe tukufwa, kumbukilāga, i Lyālabwe lisakuyaga kula ku Yorodani. Ilyēne litisakulekamo siku pamo litisakututāgāmo siku. Itolo kumbukilāga ikyo. U Kuyapo-bwīla kwa Mīsi ukufuma ku Lyālabwe kwisakuyaga na uswe lōsa ukusuluka ukukīnda mbūmi, kangī kōpe ku Yorodani.

²⁰⁰ Unko uswe twinamisye imitu gyitu. [Unkundwe ikupa u lulagilano—Nsimbi]

²⁰¹ Akabalilo kako u Mbepo yula ikwendendeka pakati pa uswe, u Mbepo gwa Kyala ikwendendeka pakati pitu, babagile ukuyapo bala apa ulubunju ulu aba bakammanya Kristi, kangī ugwe gwe—ugwe ukaya kifuki ki Lyālabwe, ukaya mu kuyobesania ni Lyēne ulubūnju ulu? Loli umwe mumenye Ilyene kili apa. Kēta ku Lyene likubomba kulikosa, ukunkēta Umwene ikwendela ukusyungutila, muketile Ilyene likwēnda pa bandu. Uko ko Kuyapo-bwila kwa Misi. Ubo bo bupoki. Uyo yo Mbepo uyu ikwīsusya ifikopo fyābo ku būyo mpaka abēne bakabagila ukwīkōla ndutēngano kangī mma, ikindukimo kikufimbilisigwa ukwisa panja. Kangī ugwe ukammanya Umwene, ngimba ugwe kulonda ukufyusya ikiboko kyako nu kuyoba, “Nyīputīla une, Nkundwe Branham. Une lilino ngulōnda ukummanya Umwēne. Kangī une ngulonda ukuyoba nu Mwene, kangī une ngulonda ukummanya Umwene ukuya bwisusye bwa Mbepo Gwake. Une ngulōnda ukumanya ukuti Umwēne ali itolo kifuki ulubafu lwāngu, akabalilo kōsa. Une ngwītika Umwēne ali. Lōli une ngulōnda ukuya mbuyobesanie. Kangī une ndi ni kyūmīlwa, kangī une ndi ni njala kuli Kyala. Une ngulōnda ukummanya Umwene kanunupo?”

²⁰² Kyala akusaye ugwe, nkulumba. Kangī Kyala akusaye ugwe, nkulumba. Kangī ugwe, nkundwe. Ugwe, ena, kubutali kunyuma kula. Pasi apa, nkikulu, ena. Ena, nkikulu. Uswe tukuketa amaboko gako, kangī Kyala ikugabona agene. Kyala akusaye ugwe, ndumiana ntubwa. Kyala akusaye ugwe. Kangī ugwe, nkikulu. Amenī. Kyala akusaye ugwe. Akusaye ugwe, kalumbu. Umunduyumo uyungi lilino, nkabalilo ka kimyemye. Kyala akusaye ugwe, kubutali kunyuma kula, mwinitu unkeke.

²⁰³ Inogona isya ikyene. Inogona isya ikyene, u Kuyapo-bwīla kwa Misi ukufuma ku Lyālabwe, u Mbepo yulayula; ukuti Umwene ākūtīle panja kula ku lisiku lya bulongi bwa Umwene, akabalilo kako Umwene egege ubulongi bwitu. Kangī ingili ya Kyala ya bugāsi yātīkīle pa Mwēne, kangī imbībi syāko silinkuniēmbeteligwa mu ngili yila, nukuntika Umwēne, kangī i Lilopa Lyāke na mīsi galinkusōka panja ukufuma Mwēne. Umwēne alinkuti, “Tāta, mmaboko Gāko Une ngubika u Mbepo Gwāngu.” Kangī pa Lisiku lya Pentekosti, Ikyene kikwisa kwa uswe ukwisila mu njila. Kangī Ikyene kyo kifuki fiyo lilino.

²⁰⁴ Ngimba ugwe utikulōnda ukuyoba, “Une nēmbelīle kubutali

ukufuma ku kāya, Ntwa, une ngwisa ku kāya”? Akabalilo kako uswe tukwimba iki, linga ugwe kulonda ukwenda pa kigemo nukutendeka ukwikemesya-kangi, nūmwe, go moyo gwako, kwa Kristi? Amen.

Une nēmbelile kubutali na Kyala, (Ukufuma ku njila.)

Lilino une ngwisa ku kaya;

A kayila ka (Busitakwītika, umwe muketile.)
akabalilo katali fiyo une nēndile,

Ntwa, une ngwisa kukaya.

Ngwisa kukāya, ngwisa kukāya,

Kangi mma ukubunabuna;

Bālulaga i ngōngi sya lugāno Syāko,

Lilino, Ntwa, une ngwisa kukaya.

²⁰⁵ [Nkundwe Branham ikung’ung’usya *Ntwa, Une Ngwisa Kukāya*—Nsimbi]

²⁰⁶ Abalumiana batatu ababini itolo bikwēnda papapa pānja, nalōlilōli bēngo, amāsosi mmwāso mwābo, bikufugama pa lubafu lwa kigemo. Ena, abēne bahobokeligwe. Abēne bābokeligwe bobakāli abēne nukusōkamo mfikota fyābo, akabalilo kāko utwīnogono twābo utunini twālinogwīnepo. Abēne itolo bīsile kunyēni nukufugama pāsi apa, ukuleka abāndu bamanye ukuti, lo lubafu lwa ywāni abēne balipo, mu lubūnju ulu.

²⁰⁷ Une nabagile ukwīnogona ukuti bābagile ukuyapo abāndu bamo abakusipo babagile ukubōmba iki, itolo bikulōnda ukufugama pāsi, nu kuyoba, “Ntwa, une—une nēmbelile kubutali ukusōkāpo ukufuma ku kayila kala. Une nāli nu kwīlāmwa fiyo, kangu utubalilo tumo une nābētīle panja nukuya nu butulwanongwa. Lilino une—une ngulōnda ukugomokēla bo ukwēne kukīla fiyo. Kyala, une—une ngulonda ukwisa. Une ngulonda itolo ukwisa nukufugama pasi.” Amen.

²⁰⁸ Lilino, abalindwana banini batatu ba Arthur Beam, kifuki ubunywāmu bumobwēne, abēne bikwīsa pamwanya apa, bafugēme pāsi.

²⁰⁹ Kwisa kunyēni yo ndindwana unnini uyu itolo ikabīle mwēne u nkundwe unnini umpya ku kāya. Ilisiku limo une nalitugesye itolo; Nka. Wood ikwisa nukumbula une, alinkuti u kalumbu uyu ābūkāga ku kipatala ukuya nu mwāna. U Mbepo Mwikemo alinkuti, “Buka ukababule abene umwene isakuyaga ndumiana.” Akabalilo kako umwene āpapigwe, umwene ali ndumiana unnini.

²¹⁰ Kikufwana ukuya bāna ulubunju ulu, abinitu abanini bikwisa ukufuma ku i kalasi ilinini lya Kalumbu Arnold, ukwikemesya imyūmi gyābo. Ikgemo kyosa, ku kililo kyangu, kiswile na bana abanini.

211 Ikyene kikuyaga kinunu linga uswe tukwimba ulwimbo, pa kigemo, ku aba basyēle ba bandu, abakusi.

Lilino, Ntwa, une ngwisa kukaya.

Kwisa kukāya . . . (. . . ? . . .)

Nasiku kāngu ukubunabuna;
Igula lōsa ingōngi Syako isya lugano,
Lilino, Ntwa, une ngwisa kukaya.

212 Unko uswe twinamisye imitu gyitu itolo pakabalilo ku lwiputo, ku binitu abanini aba.

213 Tāta Gwakumwanya, linga apene pikwisa kilabo, linga Yeso isakukābilāga ku fyīnja kalongo pamo kalongo na fihano, aba bisakuyaga balumiana kangi balīndwāna aba bisakupīmbaga i Ndumi iyi mula ku ngulilo iyīngi iyi yikwīsa. Kisita kwilamwa mminogono gangu, Ntwa, loli go masiku gosa ga bumi bwabo abene bisakukumbuka bikwīsa ku kigemo iki. Kangi abēne bo tubwe utupala utunini, Ntwa. Utundumbula twābo utunini utukeke kangi ututēta tutobesigwe ulubūnju ulu. Komma nukupilika i Ndumi yōsa; itolo ukusōka ukufuma ku kyūmba, ukufuma ukupilika ugwītu Kalumbu Arnold ikuyoba; ukwēnda pamwanya ukusyūngutila ikigemo apa, bikupa imyūmi gyābo kwa Ugwe.

214 Lilino, Tāta, une ngindile itolo ukuyoba ukuti mwa uswe ikwitugala u Mbepo Mwikemo. Kangi u Mbepo Mwikemo uyu, lwitiko nu Mbepo uyu, ikubomba ifindu fyosa. Kangi une ngwitika ukuti isala yiyiyi iyi, Ugwe nswaga ubutulwanongwa bulibosa ubu abene babōmbīle. Kangi une ngukusuma Ugwe, nu lwitiko losa ulu luli mu ndumbula yangu, ukuti Ugwe kwisakukyūngāga utubūmi twābo utunini ukusuluka ukukinda pa nsebwe. Abēne balingayōngāga nasiku ukufuma pa Njila.

215 Iki nubwanaloli kyo kindu ikihesya. U Mbepo āyobīle ulubunju ulu, uswe tubagīle “ukukēta ikindukimo ikihesya.” Kyala, linga Ugwe ulekile ukubōmba na bāngi, ēga abāna abanini. Mūmo ulubūnju ulu, mu bukōlēle bwa pakigemo, akayapo nu nkusi nayumoywēne, lōli ikibugutila kyōsa ikya bāna abanini kikwīsa pamwanya. Loli, iyene yaali Ndumi ingulumba iya kupilikisya kukafu, na kope ku bakusi, loli abana bakolile u Mbepo gwa Iyene. Uswe tukupālisya Ugwe panongwa ya bēne, Tāta. Une ngubapa abēne kwa Ugwe, ukuya ntumigwa Gwāko, ukuya fyabupōnjoli fya lukomano ulu; kabuno, ukukūmbukila ukuti u Buyepo-bwīla bwa Mīsi ga Būmi bwisakwēndelēla na bēne akabalilo kaōsa abēne būmi. Abēne baliyaga nu lwītiko lilino mu itolo iki kyo kikuboneka, ukuti Kyala uyu abakwābīle abēne ukufuma ku kikota nukubatuma abēne pamwanya apa, abēne bali yaga nu lwītiko mwa Kyala amasiku gōsa ga būmi bwābo. Imbepo syabo inīni silitwaligwaga kwa Ugwe mu lisiku lya bufwe bwabo; bāt wālīgwe ukugomokela

ku mbili gwabo mu lisiku lya busyuke. Abène bo Bāko, Tāta. Uswe tukupa abène kwa Ugwe ukwisila mu Ngamu ya Yeso.

216 Akabalilo kako uswe twinamisye imitu gyitu pasi. Une ngubalālúsyā bāna banini aba ku kigemo, aba bikwitika ukuti Yeso yo Mpoki gwako kangi Yuyo Uyu ababulile umwe, kunyuma kula nkilundilo, ukwisa kuno nukufugama pasi ukusyungutila i kigemo iki. Ngimba umwe mukwitika ukuti Yeso abaganile umwe kangi ikuswa ubutulwanongwa bwinu? Une ngulonda umwe mwesa ukwima pa malundi ginu nukuketa kunyuma apa ku kilundilo. Iyi, iyo yo njila iyi ugwe ubagile ukubūla abandu ukuti ugwe kwitika ukuti Yeso ikukupoka ugwe. Lilino imilila pa malundi ginu, uko ko kotalusya, kangi kēta kulakula ku kilundilo. Mwesa umwe balumiana na balindwana banini mwe munganile Yeso, imilila mmwanya nukuketa kunyuma kwa kilundilo kula, aligwesa gwa umwe.

217 Bule umwe balindwana banini apa mu nkyeni? Ngimba umwe mukwitika? Ngimba umwe munganile Yeso? Abalindwana abanini aba apa, ngimba umwe munganile Yeso ni ndumbula yinu yosa? Ngimba umwe? Umwe munganile Umwene? Ugwe unganile Umwene, ndumbulanyafu? Ima mmwanya apa, unko abāndu bamanye ukuti ugwe unganile Yeso. Kyala akusaye ugwe.

218 Lilino unko uswe tusanukile injila *iyi* nukwimba ku bandu aba bo tukāli uswe ukusōkapo, “Yeso anganile une! Iki une mmenye, i Bangeli likumbula une bo ulo.” Muketile? Unko uswe itolo tufyūsye amaboko gītu bo uswe tukwimba ulwēne lilino. Umma ndaga, unko uswe twimbe ulwēne.

Yeso anganile une! Iki une mmenye,
Kabuno i Bangeli likumbula une lūlo;
Abanini ku Mwēne bobāke,
Abène bo bōnywa . . .

219 Lilino bika amaboko ginu mmwanya . . . ? . . . Twesa ba uswe palikimo:

Ena, Yeso anganile une,
Ena, Yeso anganile une,
Ena, Yeso anganile une,
Ili Bangeli likumbula une lulo.

220 Lilino umwe mwesa andisya ukufuma kwa une: Une ngwitika Yeso Kristi yo Mwanundumiana gwa Kyala. Umwisyugu, une ngwitikisya Umwene ukuya Mpoki gwangu panīmwene. Ukufuma ilisiku ili, ukubuka nkyeni, une nisakungana Umwene nukumbombela Umwene. Amen.

221 [Nkundwe Ben Bryant ikuyoba, “Nkundwe Branham, une ndinabo abāna bana pa ndumbula yāngu pa kabalilo aka. Ngimba ugwe ngulamba kwisakubīputilāga abène?”—Nsimbi] Naloli ngwisa, Nkundwe Ben.

²²² Gwakumwanya Tāta, unnyāmbāla uyu ikukēta bala abāngi abāna abanini bikwisa kwa Kristi, kangi umwene ikukuuta panja, ukuya tāta, panongwa ya banini bake bene. Kangi u Mbepo uyu abatwele abanini aba abanini aba ku kigemo, u Mbepo yulayula alipokaga a bāna bake, Ntwa. Tupaga ikyene. Uswe tukubapa abene kwa Ugwe, Tata, mu Ngamu ya Yeso Kristi.

²²³ Lilino bo umwe binitu banini mukugomokela ku kikota kyinu, une ngulonda aligwesa mu lubambiko ulo ukuponania amaboko na bāna banini aba, pamo ukubapapata panyuma abene bo abene bikugomokela. Umwe mwēsa gomokela ku fikota fyīni, injila *iyi*. Kangi unko aligwēsa ukwisila mula itolo bapapātāga abīnitu abanini. Kangi uswe tubaganile umwe ni ndumbula syitu syōsa. Umwe mwe mbakasya sya Mbili gwa Kristi, itolo bo bwingi mu Kyene bo mumo tuyilile uswe.

Uswe tukukūya ku Siyoni,
Mmogi, mmogi u Siyoni;
Uswe tukukūya mmwanya ku Siyoni,
Kala a Kaya akamogi ka Kyala.

I saga, uswe twe tunganile u Ntwa,
Kangi unko isangaluko syītu silimanyigwāga,
Mweisa mu lwīmbo nubukobebe ubunyāfu,
Mweisa mu lwīmbo nubukobebe ubunyāfu,
Kangi bo ulo tusyūngutilege i Kikota,
Kangi bo ulo tusyūngutilege . . .

Uko ko kwamaka ukwīmba ukununu! Unko uswe tufyūsye ifiboko fyītu.

Uswe tukukūya ku Siyoni,
Mmogi, mmogi u Siyoni;
Uswe tukukūya mmwanya ku Siyoni,
Kala a Kaya akamogi ka Kyala.

Unko uswe itolo tuponania amaboko ga yumo nu nnine akabalilo kako uswe tukwimba lilino.

Uswe tukukūya ku Siyoni,
Mmogi, mmogi u Siyoni;
Uswe tukukūya mmwanya ku Siyoni,
Kala a Kaya akamogi ka Kyala.

²²⁴ Lilino unko uswe twīme ni mitu gyītu twinamisye pasi, akabalilo kako uswe . . . Kuba ikyēne Nkundwe Teddy, itolo i . . .

²²⁵ Une ndi ni fyākusūma fimo apa, kangi ififūnga na fyosa bo ifyo. Ifyēne fibagile ukufuma ku fisu fyāpanja. Billy āmbulāga une abēne bāli nu tulato twa mwanumfyēle ukufuma kwa mwanumfyēle unnini kula mu England kifuki ubutali bo *ulo*, akāndu akanini ko mōsa kakokonyēle lōsa. Kangi uswe tukulōnda ukwīpūtīla ako, kōpe.

226 Kāngi popāpo . . . [Nkundwe Ben Bryant ikuyoba, “Nkundwe Branham, ngulamba hobokela une panongwa ya kwingilila mula, lōli iputa ukuti, uyu ātikile iligali lyītu nkilo kya mmayolo, pa lisaya lya kukīmama kunkyeni, iputa ukuti kila kisakusetuligwaga. Ipūta ukuti u Ntwa ikusetulaga ikyene.”—Nsimb] Amen, Nkundwe Ben, une naloliloli ngubombaga ikyo. [Nkundwe Branham ikung’ung’usya *Uswe Tukukūya Ku Siyoni.*]

227 Mumo uswe tukukūyīla, Ntwa, uswe tumenye ukuti i Lyālabwe ilitikigwe lila lili papapa mula nkati na uswe, u Kuyapo-bwīla kwa Misi ukufuma ku Lyalabwe likubuka ni Kipanga. O Gwabwīlanabwīla Kyala, twabula uswe, ulubunju ulu, ulwitiko mwa Kyala uyu ulu luli na uswe. Une mmenye Ugwe kwisakubōmbāga, itolo mūmo uswe tubagīle ukwāga ubukūndwe na Ugwe, ukuti Ugwe ubagīle ukutusūbīla uswe ni Kyēne. Linga Ugwe ubagile ukukipapo Ikyene mbwisusye, uswe tubagile ukukyōnānga Ikyene, Ntwa. Loli linga uswe tukwaga ilipyana na Ugwe, itikisya ikyene kibombigwege.

228 Unkundwe gwītu āyobīle umunduyumo atikile iligāli lyāke. O Kyala, uswe tumenye unnyambala akaya ni hela ukubōmba ifindu ifi. Une ngusuma ukuti Ugwe kuntwalaga umwinitu pa butobesigwe, pamo ikindikimo, umwene abagile ukupinduka panongwa ya iki, ikwīsa, ikuyoba, “Nkundwe, une nisakutēdekesya iligali lyāko, une nābōmbile ikyēne.” Ntula u Nkundwe Ben na baganigwa bāke.

229 Apa filāmbaléle nkiboko kyāngu fyo tufunga ni fyakusuma, bali nu lwītiko mwa Kyala yula. Mōse āli nu lwītiko mwa Kyala yula, kangi umwene ālobwike i nyanja. Danieli āli nu lwītiko mwa Kyala yula, kangi ātwāligwe ukufuma ku mbako ya ngalamu. Shadraki, Meshaki, na Abednego, bāli nu lwītiko mwa Umwēne, nukusimisya umoto.

230 Pauli āli nu lwītiko mwa Umwēne, kangi ilisiku limo akabalilo kāko ingomano sila syali ngafu naloli kangi Pauli alinkutoligwa ukufika kwa aligwesa, umwene itolo alinkwega ikifūnga, umwene alinkuti, “Une ngwitika ukuti Kyala ali na une.” Umwene alinkubika amaboko gake pa fifunga nu twenda, kangi imbepo sya bubibi syābūkile ukufuma ku bāndu, nu bubine ni mbungo syāsōkiléko ku bēne. Kyala, une ndinalo u lwītiko mwa Kyala yulayula. Ububībi buli sōka ngapo. Ububine, imbūngo, nu bōnywa, ikyēne kilisōkaga ngapo, Ntwa.

231 Ugwe gwe Kyala yulayula uyu āyobīle kwa une pāsi pala mu Mbanda ya Moto yila, pāsi pa kisōko. Ugwe gwe Yuyo uyu ali ni kifwāni Kyako kitulikigwe apa na une, pa kibumba. Ugwe uli na uswe, Ntwa. Ugwe gwe njepo-bwīla, yila i Mbanda ya Moto yilayila. Kangi uswe twīkyelīle a Misi ukufuma ku Lyalabwe ilisiku lililyosa, bo uswe tukwingila mwa Mbepo. Polelo, Ugwe uli apa. Uswe tuli nu lusubilo mwa Ugwe, Ntwa. Uswe tuli nu lwitiko mwa Ugwe. Uswe tukwitika ukuti Ugwe

kutupakaga uswe nukututula uswe. Komma ku lwimiko lwitu, Ntwa; uswe tukuyaga bo yu Mōse akabalilo kala, akabalilo kako umwene ābombīle ikindu ikisobi. Uswe tukulōnda ukubomba ikindukimo ukukutula Ugwe, Ntwa. Ikyo kyo kyakulōnda kya ndumbula yitu, ukukutula Ugwe, linga uswe tubagile ukubomba ikyene. Ugwe tunānagīsyā uswe, Tāta, kilikyōsa Ugwe kulonda uswe ukubōmba.

²³² Kangi lilino, pa bubombelo bwa lwītiko, une ngutobesya ububine ubu ififunga ifi fikwīmīlila, ni fyakusuma ifi. Ifyene fisakubaleka abandu. Une mmenye Ugwe kubombaga ikyene, Ntwa. Une ngwitika ikyene, mu ndumbula yangu, ukuti Ugwe kubombaga ikyene. Bumbulussyaga ububine bosa pakati pitu ulubunju ulu.

²³³ Pokaga bala bábo bafyusisye amaboko gabo, ukuti abene bikulonda ukwisa ku Lyalabwe, ku Misi. Kyala, abēne baliyaga bākyūmilwa fiyo umwīsyūgu, pala paliyaga u luko lwa būmi bwakyūnyu ukusyūngutula abēne, mpaka ikyene kisakupela abene ukūmilwa kuli Kristi. Tupaga ikyene.

²³⁴ Yaga na uswe ikilo iki, Tāta. O Kyala, unko une nsyāgānie, ukwisila mu fyākusūma ifi, ifi fili pa ndumbula sya bāndu. Linga kikayapo nakimo pa ndumbula yabo, polelo, Ntwa, Ugwe mbapo une ikindukimo ukulumbilila ku ndumbula syabo ikilo iki.

²³⁵ Nsaye u Nkundwe Neville, nu nkasi gwake, ikikolo kyāke; ikipanga ikinini, abakyungahela bitu, abadiakoni, abandu bitu. Kangi u Mbili Gwako kulikosa, yaga na uswe, Tata. Uswe tukukibika iki mmaboko Gako, mu Ngamu ya Yeso Kristi.


. . . Siyoni;

Uswe tukukūya mmwanya ku Siyoni,
A Kaya akamogi ka Kyala.

Lilino unko uswe itolo twīmbe ulwēne, gwanaloliloli, naloliloli ku Mwēne lilino. Muketile?

Isaga, uswe twe tunganile u Ntwa,
Kangi unko isangaluko syītu silimanyigwāga,
Mweisa mu lwīmbo nubukobele ubunyāfu,
Mweisa mu lwīmbo nubukobele ubunyāfu,
Kangi bo ulu tusyūngutilege i Kikota,
Kangi bo ulu tusyūngutilege i Kikota.

Ni ndumbula syitu sineme lilino.

Uswe tukukūya ku Siyoni,
Mmogi, mmogi Siyoni;
Uswe tukukūya mmwanya ku Siyoni,
A Kaya akamogi ka Kyala. 

61-0723M Amayepo-Bwīla A Mīsi Gākufūma Mu Lyālābwe
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org